

## Mak Mak belej Mere iginj Yesu nin yitin kayyin

### *Yon Baptais belej gitik iryin*

<sup>1</sup> Barañ iginj gabe Yesu Kristu, Al Kurun Urmin gote barañ fudinde goyen min urenj tihim.

<sup>2</sup> Be, Al Kurun belej Urmin mere iryin goyen mere basanj almin porofet kura Aisaia belej asande gahade kayyin:

“Metenj alne tenj kermeke mehenj hej kuyenj.

Kunbe belejge kerde gunyenj.”\* *Malakai 3:1*

<sup>3</sup> “Sawsawa po kurun nana bana gonj al kura forok yenbe alya bereya belej Doyanj Al Kurunjen mere nurde gama ird ird nin du-fay gitik tenj tenj ge gahade kuware tagalde hiyenj:

‘Doyanj Al Kurunjen belej kernañ.

Belenminj sope irde huwa irnanj,’ yirinj,” yitin hi. *Aisaia 40:3*

<sup>4</sup> Ningeb Yon Baptaisbe sawsawa po kurun nana bana forok yenbe alya bereya baptais yirde saba tagalde hinhin. Sabaminjbe gahade: “Mata buluntinj yubul tenj Al Kurun nin bitinj mulganj henañ. Irkeb Al Kurun belej mata buluntinj halde dunke baptais tenayinj,” yinenj hinhin. <sup>5</sup> Irkeb

---

\* **1:2:** Mere gabe Aisaia belej ma kayyinj. Malakai belej kayyinj. Gega Aisaia be Al Kurunjen mere basanj mar kurun bana gonj nin al denjem kenkelakbe gogo geb, Mak belej Aisaia denjem kayyinj.

alya bereya Yudia naŋa goyen bana niŋ taun kurun Yerusalemya naŋa bana gon niŋ taun hoyanya hoyanya goyen budam wor po Yon hitte kun hinhan. Kunbe mata bulunmin ge Al Kurun pohogay irkeb Yon beley Yodan fete baptais yirde hinhin.

<sup>6</sup> Yonbe dapna kamel wuyneŋ beley ulinhor irtin goyen hor irdeb dapna sikken gore po ten kanmin irde ulinhor kerkek goyen mal temdere giti irde hiyen. Irdeb binje igin kura ma nene hiyen. Gusuya yalangu fiminya nene hiyen. <sup>7</sup> Yenbe mere gahade tagalde hinhin: “Ne harhoknerbe al kura wayyen. Yende sanjbe kurun wor po, nere folek. Niŋgeb ne gahade gare epte ma yen ge ten meten kurun titek hime. Kahan basanminde niŋ kan urgun kan yugu ten ten gobe meten kurun mon gega, go wor ne beley epte mon yen nurde hime. <sup>8</sup> Nebe fe ulin po baptais dirde hime goyenpoga yenbe Holi Spirit beley baptais diryen,” yinen hinhin.

*Yesu baptais tekeb Satan beley tunan uryin  
(Matiyu 3:13–4:11; Luk 3:21-22; 4:1-13)*

<sup>9</sup> Be, go kamereb Yesu beley Galili bana go niŋ taun dirneŋ Nasaret tubul ten Yon hitte Yodan fe sinjare wayyin. Irkeb Yon beley tukur fe alare baptais iryin. <sup>10</sup> Be, Yesu gob baptais tenbe fe ala tubul ten sinjare wakeb goya goyen po nanjin hol yirin. Irkeb Yesu beley keneŋ hikeya Holi Spirit beley yen hitte kalyin gi foy ten kattin yara ten katen kipiryin. <sup>11</sup> Irde nanjin hol yitin bana gore al melak kura forok yen Yesu mere iryin: “Gebe

urne, bubulkuṅne wor po. Ge niṅ amanṅen wor po nurde gunṅen hime,” inyinṅ.

<sup>12</sup> Be, go kamereb Holi Spirit beṅen Yesu goyen sawsawa po kurunṅ naṅa bana goṅ bul irde tukuriṅ. <sup>13</sup> Tukukeb wawunṅ 40 goṅ hinhin. Irkeb unṅurayen kurunṅmiṅ Satan beṅen Yesu mata bulunṅ tiyi yeṅ tunṅen urde hinhin. Dapṅa duwi fuleṅam yaṅ kahal bana hikeya Al Kurunṅyen miyoṅ beṅen doyaṅ irde faraṅ urde hinhan.

*Yesu beṅen komatmiṅ yawaryinṅ  
(Matiyu 4:12-22; Luk 4:14-15; 5:1-11)*

<sup>14</sup> Be, Galili naṅare niṅ doyaṅ al kurunṅ Herot Antipas beṅen Yon teṅ koyare kiryiṅ. Go kamereb Yesu go Galili naṅare kuṅbe Al Kurunṅyen mere igiṅ goyen tagalde hinhin. <sup>15</sup> Mere tagalde hinhinbe gahade: “Al Kurunṅ beṅen alya bereyamiṅ doyaṅ yireṅ yeṅ bikkeṅ nalu kiryiṅ gobe gago binde hihi. Niṅgeb yeṅ yufuk bana hitek yeṅ nurde haṅ kenem mata bulunṅtiṅ yubul teṅ Al Kurunṅ niṅ bitiṅ mulṅaṅ heṅbe meremiṅ ge dufaytiṅ saṅiṅ irnayiṅ,” yinyinṅ.

<sup>16</sup> Be, Yesu go Galili Makaanṅ fereṅ kuṅ heṅyabe Saimonya kuliṅ Andruya makaṅde kamaṅ temeyde hike yinyinṅ. Ire itinṅya gobe makaṅ dapṅa yad yad mar. <sup>17</sup> Be, Yesu beṅen irem go yeneṅbe, “Wayyi. Waṅ ne gama niryi. Irkeb al yade Al Kurunṅ hitte yukunṅ yukunṅ mar direṅ,” yinyinṅ. <sup>18</sup> Irkeb goyare po kamaṅmiṅ yubul teṅ Yesu gama iraryum.

<sup>19</sup> Be, muṅ kura kutṅen teṅbe Yemsya kuliṅ Yonyabe naniṅ Sebediya metenṅ marminiṅya hakwamiṅ hende heṅ kamaṅ sope irde hike yinyinṅ.

<sup>20</sup> Yenenbe ire itinja goyen wor hoy yiriyi. Irkeb irem go naninja meten marminja hakwa bana po yubul tenbe Yesu gama iraryum.

*Yesu beley unğura takira tiyyi*  
(Luk 4:31-37)

<sup>21</sup> Be, Yesuya komatmiñ mehenđe yawaryiñ goya irde Kapeneam taunde kwamiñ. Kuñbe Yuda marte usañ nalu Sabat hekeb Yesu beley Yuda marte gabu ya bana hurkuñbe gabu ya bana goñ hinhan mar goyen saba yiriyi. <sup>22</sup> Irkeb sabamiñ go nurdeb saba gobe Moseyen saba tagalde hañ mar beley tagalde hanjen yara moñ, irde Al Kurunyen sañiñ minyañ beley saba titiñ yara saba tike kenenbe dinon kok yamiñ. <sup>23</sup> Be, goyare goyenbe unğura ketal urtiñ al kura gabu ya bana goñ hinhin gore kekew tiyyiñ. <sup>24</sup> Kekew tenbe gaha inyiñ: “Yesu, Nasaret niñ al! Gebe daha dire yen wayha? Gwamuñ dure yen wayha? Neb nurde gunen hime. Gebe Al Kurunyen Urmiñ wor po,” inyiñ. <sup>25</sup> Irkeb Yesu beley mere hitemde po, “Bada hawa, irde al go tubul ten kat kwa!” inyiñ. <sup>26</sup> Irkeb unğura gore al goyen uguñ po anğor anğor irde kekew tenbe tubul ten kat kuriñ.

<sup>27</sup> Be, al gor hinhan mar gore kenenbe hurkunkat wor po tenbe tigiri ten kadom gusañ gird tiyamiñ. “Ey, gab dahadebe gago? Saba gabe tinen wor po, Al Kurunyen sañiñ minyañ. Niñgeb unğura wor meremiñ nurdeb al go tubul ten busaharhañ!” yamiñ. <sup>28</sup> Irkeb Yesuyen mere momon gobe Galili nana bana goñ bemel po kurun hen kuriñ.

*Yesu beley al budam guram yirde hinhin  
(Matiyu 8:14-17; Luk 4:38-41)*

<sup>29</sup> Be, Yemsa Yonya irde Yesuya komatminj hoyanj kura goya gobe gabu ya go tubul tenbe goyare po Saimonya Andruyat yare kwaminj.

<sup>30</sup> Yare gorbe Saimon tenakbe ayganj bulun po irke ferde hinhin. Irkeb goke Yesu momonj iraminj.

<sup>31</sup> Irkeb kunj kenenbe haniinde tanarde faranj urde isanj hekeb ayganj gob tubul tiyyinj. Irkeb bere go huwardebe Yesuya komatminjya goyen binje kanj yunying.

<sup>32</sup> Be, Yesuyen mere momonj nuraminj mar beleybe goyen wawunbanare goyen numtuk urde hikeb Sabat nalu hubu hihi yenbe Yesu hitte garbam marya unjura beley ketal yurtinj marya kurunj goyen yade wayaminj. <sup>33</sup> Be, Kapeneam taunde ninj al buda kurunj goyen wanj Yesu hinhin ya goyen dilinj mar gabu iraminj. <sup>34</sup> Irkeb Yesu beley garbamminj kurayen kurayen goyen sope yiryinj. Irdeb unjura beley al ketal yurtinj goyen wor yakira tiyyinj. Goyenbe unjura gore Yesube al gwahade yenj nuraminj. Gega, “Ne ninj ma tagalnaying,” yinenj utanj yiryinj.

*Yesube Galili nanja bana saba tagalde hinhin  
(Luk 4:42-44)*

<sup>35</sup> Be, nanja hako ga fay urde hikeyabe Yesu huwarde ya go tubul tenj nanja al minmonde kurinj. Kunjbe Al Kurunja mere tenj hinaryum.

<sup>36</sup> Irkeb Saimonya kadom yagoya beley kunj yenj ge nankenenj hinhan. <sup>37</sup> Irde kenenbe, “Al buda kurunj gayen ge ninj nankenenj hanj,” inaminj.

<sup>38</sup> Irkeb Yesu beley wol henbe, “Nebe saba tagal

tagal niŋ wamiriŋ. Niŋgeb wake tiyuŋ binyaŋ binyaŋ ga wor kuniŋ. Kuŋ goyaŋ wor saba tagalde tukeŋ,” yinyiŋ. <sup>39</sup> Gwaha yeŋbe Galili naŋa bana kuŋ Yuda marte gabu yayaŋ saba tagalde uŋgura yakira teŋ hinhin.

*Yesu beleŋ al kura busuka miŋyaŋ sope iryiŋ  
(Matiyu 8:1-4; Luk 5:12-16)*

<sup>40</sup> Be, al kura busuka miŋyaŋ beleŋ Yesu hitte waŋ kahaŋ miŋde kuku kaŋbe eseŋ mere irde, “Dufayger wilakneŋ nurde ha kenem igiŋ sope nirayiŋ,” inyiŋ. <sup>41</sup> Gwaha inkeb Yesu beleŋ bunineŋ wor po nurdeb haniŋ temeyde al go tanaryiŋ. Irdeb, “Igiŋ sope gireŋ geb, igiŋ hawa!” inyiŋ. <sup>42</sup> Irkeb goyare po usu buluŋ go hubu hekeb igiŋ hiriŋ. <sup>43-44</sup> Irkeb Yesu beleŋ, “Al hoyaŋ kura mata gake momoŋ ma yirayiŋ,” ineŋ hayhay irdeb, “Al Kuruŋ doloŋ ird ird mata doyaŋ mar hitte po kuŋ ulge yikala yirayiŋ. Irkeb ulge go keneŋ fudinde igiŋ hihi yekeb Mose beleŋ bikkeŋ yiriŋ mata goyen gama irde dapŋa kura teŋ mel go yunkeb ge niŋ teŋ Al Kuruŋ kumba teŋ unnayiŋ. Irkeb al tumŋaŋ fudinde igiŋ haha yeŋ gennayiŋ,” ineŋbe, “Igiŋge kwa!” inyiŋ. <sup>45</sup> Goyenpoga al go siŋare kuŋbe igiŋ hiriŋ goke mali po tagalde tukuriŋ. Irkeb mere go kuŋ kuruŋ hiriŋ. Goke teŋbe Yesu goyen taunyaŋ kawan heŋ kutek ma irkeb al miŋmoŋ naŋayaŋ po heŋ kuŋ hinhin. Goyenbe albe tiyuŋ kurhan mat kurhan mat kinniŋ yeŋ waŋ hinhan.

## 2

### *Yesu beley al ulinj kamtiñ sope iryiñ (Matiyu 9:1-8; Luk 5:17-26)*

<sup>1</sup> Be, wawuñ karwo ma sipte wet kura heñbe Yesu go tebañ Kapeneam kuriñ. Kuñ yare hikeb albe nuramiñ. <sup>2</sup> Nurdeb kinniñ yeñ al budam wañ yare gor gabu iramiñ. Irkeb Yesu beley saba tagalde hinhin. Ya biñ bana goñbe gasuñ makinñ wor po hiriñ. Ya siñare wor gwahade po. <sup>3</sup> Gwaha teñ hikeb al sipte kura gore al ulinj kamtiñ sapirte teñ wayamiñ. <sup>4</sup> Gega beley gwaha mat kura Yesu hitte tukutek moñ yirkeb teñ ya goyen hende hurkamiñ. Hurkuñbe Yesu hinhin turte gor yameñ iramiñ. Irdeb garbam al go sapirte palgir irke Yesu hinhin binde kurkuriñ. <sup>5</sup> Irkeb Yesu beley dufaymiñ tareñ go yeneñbe al ulinj kamtiñ goyen, “Urne, mata bulunje halde gunhem,” inyiñ.

<sup>6</sup> Goyenterbe Moseyen saba mar kura gor keperdeb biñde po, <sup>7</sup> “Al gabe al dahade niñgeb mere gwahade tiya? Al Kurun po gab alyen mata bulun halde hiyen. Yeñbe Al Kurun sukal irde hi,” yeñ dufay heñ hinhan. <sup>8</sup> Gwaha teñ hikeb Yesu beley yeneñ bebak teñbe gaha yinyiñ: “Daniñ dufay gwahade kerde hañ? <sup>9</sup> Damiñbe meteneñ? ‘Mata bulunje halde gunhem,’ inhem goyen ma ‘Huwarde sapirge teñ kwa,’ iney goyen? <sup>10</sup> Gogab deñ beley, ‘Nebe Al Urmiñ,\* megen niñ marte

---

\* **2:10:** Al Urmiñ gote miñbe alya bereya Al Kurun hitte Yumulgañ teñ teñ Al. Daniel 7:13 gorbe denjem Al Urmiñ goyen hi.

mata bulun halde halde sanin minyan, 'yen nen-nayin,' yinyin. Gwaha yinenbe garbam al goyen, <sup>11</sup> "Ne gare ginhem. Huwarde sapirge ten yager kwa!" inyin. <sup>12</sup> Inkeb al tumnan kenen hikeya huwardeb sapirmin ten sinare kat kurin. Irkeb al tumnan gor hinhan goreb hurkunat tenbe, "Ey, mata gahade kura ma kenen hityen. Da matabe gago?" yenbe Al Kurun turun iramin.

*Yesu beley Liwai hoy iryin  
(Matiyu 9:9-13; Luk 5:27-32)*

<sup>13</sup> Be, Yesu go teban Galili fe ala kurun ferenyan kun hikeb al budam yen hitte wayamin. Irkeb saba yirde hinhin. <sup>14</sup> Kun henyabe Alfius urmin Liwai teks yad yad gasunde† keperde meten ten hike kinyin. Kenenbe, "Gama nira," inkeb Liwai go huwarde gama iryin.

<sup>15</sup> Be, Yesu go komatminya Liwaiyen yare kunbe Liwaiyen meten kadom yagoya Moseyen saba kenkela ma gama irkeb Yuda marte tikula sanin po gama irde hanyen Farisi mar beley "mata bulun mar" yinen hanyen mar goya dula ten hinhan. Al budam yenya hinhan. <sup>16</sup> Gwaha ten hikeb Farisi mar kura Moseyen saba tagalde hanyen mar beley yenenbe Yesuyen komatmin goyen yinamin: "Dahade ningeb yenbe teks yad yad marya 'mata bulun mar' yinen hityen mar goya dula ten han?" <sup>17</sup> Gwaha yinke nurdeb Yesu beley wol henbe, "Al ulinde iginbe guram al nin ma nurde hanyen. Garbam al po gab guram al nin

---

† **2:14:** Roma gabmanyen teks hora ten ten gasun. Roma gabmande hora ten ten goke Yuda mar beley igin ma nurde hinhan.



nurde hanjen. Nebe neŋ al huwak yeŋ nurde han mar goyen faran yure yeŋ ma wamirin. Gwaha titneŋbe neŋbe mata buluŋ mar yeŋ nurde han mar faran yure yeŋ wamirin,” yinyin.

*Farisi mar beŋe biŋge kutŋa ird ird mata niŋ Yesu gusuŋaŋ iramiŋ*  
(*Matiyu 9:14-17; Luk 5:33-39*)

<sup>18</sup> Be, Yon Baptaisyeŋ komatya Farisi maryabe biŋge kutŋa irde hinhan. Irkeb al kura Yesu hitte waŋbe, “Yonyen komatya Farisi marte komatyabe biŋge kutŋa irde han gega, danin geb komatgebe gwaha ma teŋ han?” inen gusuŋaŋ iramiŋ. <sup>19</sup> Irkeb Yesu beŋe wol heŋbe gaha yinyin: “Dahade niŋgeb tikiŋ mere miŋ al yiŋgeŋ hikeya biŋge netek marbe biŋge kutŋa irnayeŋ? Gobe epte moŋ. <sup>20</sup> Gega kame kura tikiŋ mere miŋ al go yubul teŋ kuke gab igin biŋge kutŋa irde hinayeŋ.

<sup>21</sup> “Al kura amil gergeŋ teŋ amil bikkekya ma gada iryeŋ. Gwaha iryeŋ gobe amil gergeŋ gote kaŋ beŋe amil bikkek yuluŋ tikeb yameŋ go kuruŋ wor po hiyyeŋ. <sup>22</sup> Al kura wain fimiŋ gergeŋ teŋ dapŋa sikkeŋ beŋe po wain fimiŋ heŋ heŋ irtiŋ bikkek bana goŋ ma unyeŋ. Gwaha iryeŋbe wain fimiŋ gergeŋ goreb wain fimiŋ heŋ heŋ bikkek goyen kunga tike erek nene wok yeŋ pasi hekeb det irawakde tumŋaŋ buluŋ hiriryen. Niŋgeb wain fimiŋ gergeŋbe wain fimiŋ heŋ heŋ gergeŋ bana po untek,” yinyin.

*Yesube Sabat nalu gote miŋ al*  
(*Matiyu 12:1-8; Luk 6:1-5*)

23 Be, Sabat nalu kurare kurab Yesuya komatminya wit<sup>†</sup> metenyaŋ kuŋ hinhan. Kuŋ heŋbe komatminj beleŋ wit igineŋ yad naminj. 24 Go nene hikeya Farisi mar beleŋ waŋ yeneŋbe Yesu goyen, “Sabat nalure mata gwaha ma teŋ hinayinj yitiŋ goyen komatge yago beleŋ mata teŋ haŋ gabe dahade?” inaminj. 25 Irkeb Yesu beleŋ wol heŋbe gaha yinyinj: “Dewitya kadomya biŋge kamde mata tiyaminj gobe ma kapyaŋ heŋ nurde hanyen? 26 Abiatar beleŋ Al Kurunj doloŋ ird ird mata doyaŋ mar gote kurunjinj hinhinyabe Dewit beleŋ Al Kurunyen ya balem bana hurkunj biŋge himam Al Kurunj doloŋ ird ird mata doyaŋ marte kudiŋeŋ goyen yade kadomya naminj. 27 Niŋgeb Al Kurunj beleŋ albe Sabat nalu niŋ ma iryinj. Sabat nalube al niŋ iryinj. 28 Niŋgeb Sabat nalu goyen wor ne Al Urminj gabe gote miŋ al,” yinyinj.

### 3

*Al haniŋ nonbo hitinj sope iryinj  
(Matiyu 12:9-14; Luk 6:6-11)*

1 Be, wawuŋ kurare kurab Yesu go Yuda marte gabu yare hurkurinj. Bana goŋbe haniŋ nonbo hitinj al kura hinhin. 2 Ya bana goŋ hinhan mar goyen kurabe Yesu beleŋ Sabat nalure sope irke goyenter merem yaŋ irniŋ yeŋ kintiŋde kintiŋde hinhan. 3 Irkeb Yesu beleŋ al haniŋ nonbo hitinj goyen, “Kuŋ al diliŋ mar huwara,” inyinj. 4 Irdeb

---

<sup>†</sup> 2:23: Witbe rais yara. Gore beret irde hanyen.

gor hinhan mar goyen, “Sabat nalure mata dahadebe igiñ? Mata buluñ ma mata igiñ? Niñgeb al sope yirtek ma yubul titeke kamnayiñ?” yinen gusunañ yiryiñ. Gwaha yinkeb mel gobe merem moñ, doñ uramiñ. <sup>5</sup> Irkeb Yesu belen tonañ tareñ mar goyen yeneñ tukuñbe biñ ar yiriñ gega, bunineñ nurde yunyiñ. Irdeb al go, “Hange giñ ira,” inkeb hanñ giñ iryiñ. Irkeb goya goyen po igiñ hiriñ. <sup>6</sup> Gwaha tike keneñbe Farisi mar gobe kat kuñ Herotyen marya gabu heñ daha mat kura Yesu mayteke kami yeñ mere sege iramiñ.

### *Al budam Yesu gama irde hinhan*

<sup>7</sup> Be, Yesuya komatmiñya gobe gor mat Galili fe ala kurun siñare kurkamiñ. Kurkukeb Galili naña bana goñ niñ al budam gama iramiñ. <sup>8</sup> Yesu mata teñ hinhin gote mere momoñ nurdeb al budam Yerusalem, Saidonyabe, Tair taunde niñya Yudiaya Idumea naña bana goñ niñ alya Yodan fe siña kurhan kurhan mat wañ Yesu hitte gabu iramiñ. <sup>9-10</sup> Yeñ belenbe al budam sope yiryiñ. Irkeb garbam mar kura gor hinhan goreb Yesu sisan urniñ yeñ kadom wen yupepel yirde kwamiñ. Al budam gwaha tikeb Yesu belen komatmiñ yago goyen, “Hakwa kura tawan nunañ. Gogab al farkaka ma nirnayiñ ge,” yinyiñ. <sup>11</sup> Be, unğura al ketal yurtiñ hinhan goreb Yesu keneñ kafura heñbe, “Gebe Al Kurun Urmiñ wor po!” inen megen kateñ kekew teñ hinhan. <sup>12</sup> Gega Yesu belen, “Al hoyañ goya momoñ yirde ma!” yinen sañiñ po hayhay yirde hinhin.

*Yesu belen komatmiñ 12 yawaryiñ  
(Matiyu 10:1-4; Luk 6:12-16)*

<sup>13</sup> Be, Yesu go naja dondonenđe kura gor hurkun al goyen yaware yeñ nurde yunen hin-hin mar go po deñe yurke yeñ hitte hurkamin. Yeñ hitte kukeb al 12 yawaryin. <sup>14-15</sup> Irdeb al 12 gokeb, “Yeñbe neya hitek. Irde hulyan yirmeke kun saba tagalde tukun hinayin. Taren yunmeke unğura yakira teñ hinayin,” yeñ mel goyen “Komatne yago” yinyin. <sup>16</sup> Al 12 yawaryin gote denembe Saimon, deñe gergen unyinbe Pita, <sup>17</sup> Sebedi urmin waran Yemsya kulin Yon denem gergenbe Boaneges. Deñe gote minbe mohon ukam yan daga kulin yara. <sup>18-19</sup> Kurabe Andru, Filip, Batolomiyu, Matiyu, Tomas, Yems yeñbe Alfius urmin, Tadius, Saimon yeñbe Selot,\* irde Yudas Iskariot. Yudas Iskariot gobe kame Yesu nin asogo hay hirin al go goyen.

*Yesuya Unğura Belsebulya*

*(Matiyu 12:22-32; Luk 11:14-23; 12:10)*

<sup>20</sup> Be, Yesuya komatminya gobe yare hurkunbe, “Binje ninin,” yamin. Gega al budam heñ ga mon sopte wan gabu irkeb epte ma dula titek hamin. <sup>21</sup> Goyenterbe Yesu taynen goyen, “Yesube kukuwa heñ hi,” mere momon nuramin. Irdeb Yesube ya goyenter hi yeñ nurdeb tiyunminde teñ kunin yeñ wayamin. <sup>22</sup> Gwaha teñ hikeyabe Moseyen saba mar kura Yerusalem mat kateñ Yesu nin yeñbe, “Al gabe unğurayen kurunmin Belsebul belen ketal urtin geb, Belsebul gote tarende unğura yakira teñ hi,” yamin. <sup>23</sup> Gwaha yeke nurdeb Yesu belen wanan yinke

---

\* **3:18-19:** Roma gabman asogo irde hinhan mar gote denembe Selot.

wan̄ gabu irkeb siraw merere gaha yinyiñ: “Dahade niñgeb Satan beleş un̄gura kadom yakira tiyyeñ? <sup>24</sup> Al miñ kurun̄ kura beleş yin̄geñ uliñ kadom asogo gird teñ bur yenayiñ gobe tareñ ma heñ tumñan̄ bulun̄ henayiñ. <sup>25</sup> Irde al miñ un̄kureñ wor gwahade po yin̄geñ uliñ kadom asogo gird teñ bur yenayiñbe tumñan̄ mugol nenayiñ. <sup>26</sup> Niñgeb gwahade goyen po Satan beleş un̄gura yeñ yufukde han̄ goyen bulun̄ bulun̄ yiryen̄be dahadem san̄iñ henayiñ? Epte moñ. Gwaha tinayiñbe tareñmiñ hubu hiyyeñ.

<sup>27</sup> “Al kura epte ma al tareñ miñyan̄de yare hurkun̄ detmiñ yawaryeñ. Gwaha tiye yeñbe al san̄iñ miñyan̄ go wa teñ fere tike hike gab epte detmiñ yawaryeñ. <sup>28</sup> Fudinde wor po dinen̄ hime. Mata bulunya sukal meretiñyabe Al Kurun̄ beleş igiñ halde dunyeñ. <sup>29</sup> Gega Holi Spirit sukal irnayiñbe epte ma wor po halde dunyeñ. Mata bulun̄tiñ gobe hugiñeñ hiyeñ,” yinyiñ. <sup>30</sup> Yesu beleş gwaha yinyiñ gobe Farisi mar gore yeñ ge yeñ, “Yeñbe un̄guram yan̄,” yekebe gogo gwaha yinyiñ.

*Yesu miliñya kuliñ wen̄ya  
(Matiyu 12:46-50; Luk 8:19-21)*

<sup>31</sup> Be, Yesu go gwaha teñ gor hikebe miliñya kuliñ wen̄ya wan̄ forok yeñbe Yesu hinhin ya goyen siñare heñbe yeñ ge keya hamiñ. <sup>32</sup> Irkeb Yesu hitte wan̄ milgu irde keperde hinhan mar beleş nurdeb, “Momkeya kolge yagoya wan̄ siñare ga heñ ge niñ yeñ han̄,” inamiñ. <sup>33</sup> Gwaha inkebe, “Ganuñbe mamneya kolne wen̄ya?” yinen̄ gusun̄an̄ yiryiñ. <sup>34</sup> Irdeb alya bereya keperde

milgu iramiņ mar goyen yenenbe, “Mamneya kolne wenjyabe gago haņ! <sup>35</sup> Alya bereya Al Kurunyen dufay gama irde haņ marbe kolne, hayneya mamne yagoya,” yinyiņ.

## 4

### *Yasuņ alyen maya mere (Matiyu 13:1-9; Luk 8:4-8)*

<sup>1</sup> Be, Yesube Galili fe ala kurunj sinare kura gor tebaņ sabamiņ miņ uryiņ. Gorbe al budam wor po gabu iramiņ. Niņgeb Yesu go hakwa dirņeņ kura goyen hende hurkuņ keperde saba yirde hike albe fe sinare heņ sabamiņ palņa irde hinhan. <sup>2</sup> Sabamiņ budambe maya mere mat yirde hinhin. Maya meremiņ kurabe gahade: <sup>3</sup> “Ga nurnaņ! Al kura wit muykeņ tur ire yeņ meteiņmiņde kuriņ. <sup>4</sup> Kuņbe wit muykeņ tur irde tukuriņ. Goyenbe kura soņ heņbe beleņyaņ katamiņ. Katkeb nu beleņ namiņ. <sup>5</sup> Kurabe hora arat geb, megeņ halgayiņ bana katamiņ. Irdeb araņ po kawaņ hamiņ. <sup>6</sup> Goyenbe filgiņiņ tareņ ma hitiņ geb, naņa beleņ kumga yirke algup nen kamamiņ. <sup>7</sup> Wit muykeņ kurabe soņ heņ yamuņ duwi bana katamiņ. Irde igiņ kawaņ hamiņ gega, yamuņ duwi beleņ awrum yurke nonbo heņ igineiņ ma hamiņ. <sup>8</sup> Goyenpoga kurabe megeņ igiņyaņ wor po katamiņ. Katen kawaņ heņ karkuwaņ heņbe igineiņ budam wor po forok yamiņ. Igiņeņ kurabe 30, kurabe 60, irdeb kurabe 100 gwahade forok yamiņ,” yinyiņ.

<sup>9</sup> Gwaha yinenbe, “Mere tenj hime gayen bebak tiniñ yeñbe kenkela palña irde gab bebak tinayin,” yinyin.

<sup>10</sup> Be, al hoyañ bur yeñ pasi hekeb komat-minya al kura yeñ gama irde hinhan marbe yeñ hitte wañ kalyañ kerdeb siraw mere tiyyin goke gusunañ iramin. <sup>11</sup> Irke wol heñbe gaha yinyin: “Deñbe Al Kurun belen alya bereyamin doyañ yird yird mata banare hiyen goyen gago kawan dikala dirhem. Gega ne ma nenkela heñ hañ marbe siraw mere tenj hime gate miñ ma nurnayin. <sup>12</sup> Ga mata gake Al Kurunyen mere basañ al Aisaia belen bikken gahade kayyin: ‘Yeñbe kenen hinayin, gega bebak ma tenj hinayin,

irde mere nurde hinayin, goyenbe miñ go ma nurde hinayin.

Mon manhan bin mulgañ hekeb Al Kurun belen mata bulunmin halde yunwon,’ katin hi,” yinyin. *Aisaia 6:9-10*

*Yesu belen yasun alyen maya mere gote miñ tagalyin*

*(Matiyu 13:18-23; Luk 8:11-15)*

<sup>13</sup> Irdeb sopte gaha yinyin: “Yasun alyen maya mere gate miñbe muñ kura ma nurde hañ? Niñgeb daha matbe siraw mere hoyañ goyen miñ bebak tinayin? <sup>14</sup> Yasun alyen maya mere gote miñbe gahade: yasun al belen wit muyken tur iryen gote miñbe al kura belen Al Kurunyen mere tagalde tukuyen. <sup>15</sup> Al kurabe wit muyken belenyañ kattin go gwahade goyen. Al Kurunyen mere nurkeb goyare po Satan belen wañ binde

mere goyen goran yiryen. <sup>16-17</sup> Munan kurabe Al Kurunyen mere nurde aman henayin. Goyenbe mere goke ten kanduk forok yekeb Al Kurunyen mere goyen aran po tubul tinayin mar gobe wit muyken hora arat bana kattin go gwahade goyen. <sup>18</sup> Al kurabe wit muyken yamu duwi dugu bana kattin yara. Yenbe Al Kurunyen mere nurnayin. <sup>19</sup> Gega hen henmin ge ug po dufay hen kanduknen nurde, megen nin samunya det kurayen kurayen yad yad nin po bin harde hike gore Al Kurunyen mere bin bana hiyen goyen hika tikeb nonbo hen iginen ma hiyyen. <sup>20</sup> Munan kura marbe wit muyken megen iginyan katen kawan henbe iginenbe budam 30, 60, kurabe 100 gwahade forok yenayin go gwahade yara. Al gobe Al Kurunyen mere nurde binde kerde gama irdeb gote iginen budam wor po forok yiryen,” yinyin.

*Hulsiyen maya mere*  
(Luk 8:16-18)

<sup>21</sup> Irdeb sopte gaha yinyin: “Al ganun kura hulsi usun urde tukun koron ten aw urde hiyen? Ma tukun pon bana kerde hiyen? Hubu wor po. Gwaha irtinenbe ten omasin hende binun irde hiyen. <sup>22</sup> Ningeb det kura banare han goyen kamebe tumnan kawan forok yenayin. Irde det kura malare han gobe tumnan kamebe hol yirke kawan heke yennayin. <sup>23</sup> Mere tihim ga min nurnin yenbe kenkela palna irde bebak tinayin,” yinyin.

<sup>24</sup> Gwaha yinenbe sopte gaha yinyin: “Mere nurhan gake kenkela dufay henayin. Mere gabe fudinde yen gama irkeb go hendebe Al Kurun



belen dufay igiñ budam dunyen. <sup>25</sup> Fudinde, al kura mere gate miñ nurde biñ hol iryenbe Al Kurunyen dufay mañ wor po hiyyen. Goyenpoga mere gobe nuryen gega, gama irtek ma iryen al gobe Al Kurun belen bikken dufay untiñ go wor tumulgan tiyyen,” yinyiñ.

*Det muyken kawañ heñ henyen siraw mere*

<sup>26</sup> Be, Yesu belen sopte gaha yinyiñ: “Al Kurun belen alya bereyamiñ doyañ yirde hiyen gote matabe gahade: al kura metenñde kuñ wit muyken tur iryen. <sup>27</sup> Irde mulgan heñ yare wañ ferd fay hiyen kurun gobe wit muyken goyen gwaha mat kura pul yen kawañ heñ hi yen ma nurde hiyen. <sup>28</sup> Hiyen kurun gobe megen fimiñ tenbe kawañ heñ kurun heñ hiyen. Hanƙapyabe pigin wa forok yiyyen. Irkeb gor matbe fuwala hiyyen. Irde go kamereb igineñ budam wor po henayiñ. <sup>29</sup> Wit sak yen yen nalu hekeb meten miñ al wañbe wit wal wal bidila tukun walde yawaryen,” yinyiñ.

*Mastet he bilmiñ gote siraw mere  
(Matiyu 13:31-32,34; Luk 13:18-19)*

<sup>30</sup> Be, Yesu belen sopte gaha yinyiñ: “Al Kurun belen alya bereyamiñ doyañ yird yird gobe dahade yen nurtek? Irde da siraw merere tagaltek? <sup>31</sup> Al Kurun belen alya bereyamiñ doyañ yird yird gobe mastet he bilmiñ dirnen muñ wor po megen kawañ hiyyen go gwahade goyen. <sup>32</sup> Kawañ heñ kuñ kurun heñ haniñ karkuwañ hekeb nu belen wañ goyañ hagam yirde hinayiñ,” yinyiñ.

<sup>33</sup> Be, Yesube maya mere budam gahade gayen po igiñ bebak tinayiñ mat saba yirde hinhin.

<sup>34</sup> Yenbe siraw merere po saba yirde hinhin. Gega komatmiñ yagoya po heñbe siraw mere gote miñ banare niñ goyen kawan bebak yirde hinhin.

*Yesu belej meñeya dubaya masi yiryiñ  
(Matiyu 8:23-27; Luk 8:22-25)*

<sup>35</sup> Be, goyen wawunbanabe Yesu belej komatmiñ goyen, “Fe ala siña kurhan iron ku-niñ,” yinyiñ. <sup>36</sup> Gwaha yinkeb al buda kurun goyen gor po yubul tenbe Yesu hinhin hakware gor hurkunbe kwamiñ. Irkeb al hoyañ wor hakwa kura hende hurkunbe Yesu gama iramiñ. <sup>37</sup> Kun hikeb meñe tareñ po huwaryiñ. Irkeb fe goyen makañ duba yara karkuwan huwarde wan hakwa siñsiñyan mayde biñ bana kurkun hinhin. <sup>38</sup> Goyarebe Yesu go hakwa kimyan belej kalku hende ferde hinhin. Irke komatmiñ belej igiñ ma nurde isañ heñbe, “Tisa, kamniñ ten hite gabe igiñ nurde ha?” inamiñ. <sup>39</sup> Irkeb Yesu go huwardeb meñeya dubaya goyen masi yirde, “Bada hiri!” yinkeb goya po yul yen kamaryum. <sup>40</sup> Irkeb Yesu belej komatmiñ yago goyen, “Denbe sañiñne ma keneñ bebak ten hañ geb, gago kafura heñ hañ?” yinyiñ. <sup>41</sup> Irkeb komatmiñ yago gobe kafura wor po heñ kadom gusuñan gird tenbe, “Da albe gago? Meñeya makanya wor meremiñ nurhar!” yamiñ.

## 5

*Yesu belej al unguram yan sope iryiñ  
(Matiyu 8:28-34; Luk 8:26-39)*

<sup>1</sup> Be, Yesuya komatmiñya gobe Galili fe ala kurun siña kurhan Gerasa marte nanare forok

yamiŋ. <sup>2</sup> Irdeb Yesu gobe hakwa tubul teŋ siŋare kat kukeb al kura uŋguram yaŋ beleŋ Yesu kene yeŋ bembare mat wayyiŋ. <sup>3</sup> Al gobe bembayan ferde kuŋ hiyen. Yeŋbe al beleŋ epte ma tanarde fere titek. Kaŋ tareŋ sende wor epte ma fere titek hiyen. <sup>4</sup> Tanarde kahaŋya haniŋya fere teŋ haŋyen. Gega sen kirinŋtiktuk heŋ kahaŋde niŋ ain manaŋ yukala teŋ hiyen. Niŋgeb al beleŋ epte ma hikaka irde fere titek hiyen. <sup>5</sup> Yeŋbe hugiŋeŋ duguyaŋ kuŋ bembayan heŋ kekew teŋ sikkeŋ hora po ilka teŋ hiyen.

<sup>6</sup> Be, al gore Yesu go gisaw mat po keneŋbe kup yeŋ waŋ Yesu kahaŋ miŋde kateŋ dokolhoŋ yuguluŋ tiyiŋ. <sup>7-8</sup> Irkeb Yesu beleŋ uŋgura goyen, “Uŋgura, gebe nurde guneŋ hime. Al ga tubul teŋ kat kwa!” inkeb uŋgura gobe woywoy yeŋ kekew teŋbe, “Yesu! Gebe Al Kuruŋ tareŋmiŋ kuruŋ wor po gote Urmiŋ. Daha nireŋ teŋ ha? ‘Buluŋ ma gireŋ,’ ninenbe masi tiyayiŋ,” yeŋ eseŋ mere iryiŋ. <sup>9</sup> Irkeb Yesu beleŋ, “Dengebe ganuŋ?” inyiŋ. Irkeb wol heŋbe, “Neŋbe budam po hite geb, dennebe Legiyon,”\* inyiŋ. <sup>10</sup> Irdeb, “Nana hitere gar mat hoyande ma dakira tiyayiŋ,” ineŋ eseŋ mere irde parsay iryiŋ.

<sup>11</sup> Be, mel go hinhan bindere gorbe bu budam wor po dugu dabayiŋde kura gor nuku teŋ dulaŋ teŋ hinhan. <sup>12</sup> Irkeb uŋgura buda goreb, “Ge beleŋ ok dinkeb kuŋ bu iro ketal yurniŋ,” ineŋ Yesu eseŋ mere iramiŋ. <sup>13</sup> Irkeb Yesu beleŋ wol heŋbe, “Igiŋ,” yinkeb uŋgura buda goyen al go

---

\* **5:9:** Legiyon gote miŋbe fulenja mar budam 5,000 niŋ yitiŋ.

tubul teŋ kuŋ bu buda goyen ketal yuramiŋ. Irkeb bu buda 2,000 goyen tumŋaŋ hul yeŋ kuŋ hamulare mat fe ala bana kurkuŋ fe nene kamamiŋ.

<sup>14</sup> Irkeb bu doyaŋ mar beleŋ mata goyen keneŋbe busaharde tiyuŋmiŋyaŋ irde metenyaŋ kuŋbe mata forok yiriŋ goke tagalde tukamiŋ. Irkeb mere go nurdeb al budam mata goyen kinniŋ yeŋ kwamiŋ. <sup>15</sup> Kuŋbe uŋgura ketal urtiŋ al go dufaymiŋ wuk yitiŋde umŋa teŋbe Yesu hinhide gor keperde hike keneŋbe kafura hamiŋ. <sup>16</sup> Irkeb mata go forok yeke kenamiŋ mar goreb uŋgura ketal urtiŋ al goyen daha mat igiŋ hiriŋ goyabe bu fe nene kamamiŋya goyen goke momoŋ yiramiŋ. <sup>17</sup> Irkeb al buda gore mere go nurde kafura heŋbe Yesu goyen, “Naŋa ga tubul teŋ kwayiŋ,” inamiŋ. <sup>18</sup> Gwaha inkeb hakwa hende hurkuŋ hikeb sope iryiŋ al goreb, “Yesu, igiŋ gama gireŋ?” inyiŋ. <sup>19</sup> Irkeb Yesu beleŋ ok ma inenbe, “Mulgaŋ heŋ tayge hitte kuŋ Al Kuruŋ beleŋ bunineŋ girde sope gira goke momoŋ yirayiŋ,” inyiŋ. <sup>20</sup> Irkeb Dekapolis naŋa bana Yesu beleŋ sope iryiŋ goyen tagalde tukuŋ hinhin. Tukukeb al budam al go keneŋ meremiŋ nurdeb diliŋ fot yamiŋ.

*Yesu beleŋ garbam bereya bere dirneŋ kamtiŋ sope yiryiŋ*

*(Matiyu 9:18-26; Luk 8:40-56)*

<sup>21</sup> Be, Yesu gob sopte mulgaŋ heŋ fe ala kuruŋ siŋa kurhan Kapeneam kuŋ fe siŋare hikeb al budam waŋ gabu irde kalyaŋ keramiŋ. <sup>22</sup> Irkeb gor niŋ Yuda marte gabu ya doyaŋ al kura Yairus

gore Yesu hitte wayyiñ. Wañ keneñ yende palap matare Yesu kahañ miñde urgun kañ kuku tenbe, <sup>23</sup> “Werne kameñ tej hi. Niñgeb arañ wañ hange kerd unkeb igiñ heñ huwaryeñ,” iney esey mere iryiñ. <sup>24</sup> Irkeb meremiñ goyen nurde Yesu go yeñya kwaryum. Kuñ hikeyab al budam kalyañ kerde tawtaw irde gama irde hinhan.

<sup>25</sup> Be, goya goyenbe bere kura danduku miñyañ goyen al gabu irde kuñ hinhan bana goñ kuñ hinhin. Garbam gobe gayakkek moñ. Damamiñbe 12. <sup>26</sup> Niñgeb bere gobe garbam goke guram al budam hitte sope nirnañ yeñ kuñ heñbe horamiñ go hende pasi irde hiyen. Goyenpoga guram kurayen kurayen gore igiñ ma irde hiyen. Igiñ hitheñbe buluñ wor po heñ hiyen. <sup>27-28</sup> Gega Yesuyen mere momoñ nurde hiyen geb, “Kuñ amilmiñ po sisan urdeb igiñ hewey,” yeñ du-faymiñ sañiñ irdeb kuñ al buda goyen pota yirde Yesu harhok beley mat amilmiñ sisan uryiñ. <sup>29</sup> Irkeb dari temeyde hiyen goyen goyare po hubu hiriñ. Irkeb, “Garbam go nubul tiya,” yeñ nuryiñ.

<sup>30</sup> Be, goya goyen po Yesube tareñmiñ tubul ten kuriñ goyen nuryiñ. Nurdeb al budam gama irde hinhan goyen fulgañ kañbe, “Ganuñ beley sisan nura?” yineñ gusuñañ yiryiñ. <sup>31</sup> Irkeb komatmiñ yago beley, “Al karim ma kalyañ gerde hañ gayen go ma yeneñbe ‘Ganuñ sisan nura?’ yeñ gusuñañ heñ ha?” inamiñ. <sup>32</sup> Gega Yesube, “Ganuñ beley sisan nura?” yeñ nankeney po hinhin. <sup>33</sup> Irkeb bere gobe uliñde mata forok yiriñ goyen nurdeb kafura heñ barbar yeñbe wañ Yesu kahañ miñde

kateŋ dokolhoŋ yuguluŋ teŋbe, “Ne beleŋ tihim,” inenŋ garbam bikkeŋ hiyen goyen goke fudinde po momoŋ iryiŋ. <sup>34</sup> Irkeb Yesu beleŋ, “Werne, Al Kuruŋ beleŋ dufayge tareŋ go keneŋbe sope gira geb, kandukge hubu hihi. Niŋgeb amaŋenŋ nurde kwayiŋ,” inyiŋ.

<sup>35</sup> Be, Yesu beleŋ bere goyen mere irde hikeyabe al kura gabu ya gote doyaŋ al Yairusyen yare mat waŋbe, “Werge bikkeŋ kama geb, tisa ga tuktawaŋ irde ma,” inamiŋ. <sup>36</sup> Gwaha inkeb Yesu mere go nurdeb Yairus inyiŋ. “Kafura heŋ ma yo. Al Kuruŋ niŋ po dufayge saŋiŋ irayiŋ.” <sup>37</sup> Gwaha inenbe yeŋ gama irde hinhan mar gob tumŋaŋ yakira teŋbe Pita, Yemsya kuliŋ Yonya po yade kuriŋ.

<sup>38</sup> Be, kuŋ Yairusyen yare forok yeŋbe gor hinhan mar gore esenŋ naŋa teŋ kekew teŋ epte ma teŋ hinhan goyen yinyiŋ. <sup>39</sup> Irdeb ya bana hurkuŋbe, “Daniŋ kekew teŋ esenŋ buluŋ po teŋ haŋ? Diriŋ gabe ma kama. Duliŋ ferde hi,” yinyiŋ. <sup>40</sup> Gwaha yinkeb gor hinhan mar gore hinmaŋ iramiŋ. Irkeb Yesu beleŋ ya bana hinhan mar go, “Siŋare kunaŋ!” yinenŋ yakira teŋbe diriŋ gote miliŋya naniŋya irde komatmiŋ karwo go po yade diriŋ hakwam hinhin bana goŋ hurkamiŋ. <sup>41</sup> Irdeb diriŋ gote haniŋ tanarde, “Talita, kum!” inyiŋ. (Meremiŋ gote miŋbe, “Bere diriŋenŋ, ne beleŋ ginhem ge. Huwara!”) <sup>42</sup> Irkeb goyare po bere diriŋenŋ go huwarde goyaŋ go kuŋ waŋ tiyyiŋ. (Yeŋbe damamiŋ 12.) Gwaha tikeb go kenamiŋ marbe diliŋ fot yamiŋ. <sup>43</sup> Irkeb Yesu beleŋ, “Mata kenhaŋ gayen gake ma wor wor tagalde

tukunayin,” yinenbe, “Bere dirnen ga binje kura unke niwi,” yinyin.

## 6

### *Yesu go tiyumin Nasaret mat takira tiyamin*

<sup>1</sup> Be, Yesu belen nana bana go tubul ten komatminya tiyumin Nasaret hurkamin. <sup>2</sup> Irkeb Yuda marte usan nalu Sabat forok yekeb gabu yaminde kun saba tagalyin. Sabamin gob hoyan wor po nurdeb hurkunat tenbe, “Al gabe saba dare nin tiyun? Dufaymin yago wor folekken. Yenbe mata tinen tinen yirde hi! <sup>3</sup> Yenbe kapenta mon? Irde Maria urmin mon? Kulin yagobe Yems, Yosep, Yudasyab Saimonya. Haymin yagobe nenya ma gar tumnan hityen?” yamin. Irde binde bulun nurd unamin. <sup>4</sup> Gwaha tikeb Yesu belen, “Al Kurunyen mere basan albe taynenya tiyuminde nin marya belen palap ma irde hanyen,” yinyin. <sup>5</sup> Irdeb Al Kurunyen tarende mata tinen turnun yan kura epte ma irtek hirin. Gorbe garbam mar yunurenen po hanin kerd yunen sope yiryin. <sup>6</sup> Tiyuminde nin mar belen Yesu mata ten hinhin go kenen fudinde yen ma nurde hikeb kukuwammen nuryin.

### *Yesu belen komatmin 12 hulyan yiryin (Matiyu 10:5-15; Luk 9:1-6)*

Be, gwaha tenbe Yesu tiyun kurayan kurayan kun saba tagalde hinhin. <sup>7</sup> Irde komatmin 12 go hoy yirke wan gabu irkeb irawam irawam hulyan yiryin. Irdeb ungora yakira ten ten tare manan yunyin. <sup>8-9</sup> Komatmin yago goyen kunin ten hikeb gaha yinyin: “Denbe binje, kalwa, horaya det

hoyan goya ma yawarnayin. Kahan basantin po yerde genun po yanarde kunayin. Ulinhorbe ultinde han gog ep. Hoyan ma yawarnayin. <sup>10</sup> Kun tiyunde kura forok yenbe ya unkuende po hej meten ten hinayin. Ya kurar kurar ma hinayin. Irdeb meten pasi irdeb tiyun go tubul ten hoyande kunayin. <sup>11</sup> Gega tiyun kurar kura kun forok yeke sabatin ma nurde dakira tikeb kahaninde nin tupi yaran ten tiyunmin go tubul ten kunayin. Gwaha tike gab Al Kurun dilinde mata bulun titekeb gogo gwaha tahan yen nurnayin,” yinyin.

<sup>12</sup> Gwaha yinkeb mel go tubul ten kwamin. Irde mata bulun yubul ten Al Kurun nin bin mulgan hej hej mata goyen alya bereya hitte tagalde kun hinhan. <sup>13</sup> Irde al budam ungura ketal yurtin goyen yakira ten al budam garbam minyan goyen olip fiminde sam yirde hanin yerd yunke igin hej hinhan.

*Yon Baptais kamyin*  
(*Matiyu 14:1-12; Luk 9:7-9*)

<sup>14</sup> Be, Yesu denembe kurun wor po hej tukukeb Galili nana doyan al kurun Herot Antipas manan nuryin. Al kura marbe, “Yon Baptais kamyin goyen mulgan hiyun geb, gogo mata tinen turun yan Al Kurun po titek goyen ten hi,” yen hinhan. <sup>15</sup> Al kura marbe, “Yenbe Elaia,” yen hinhan. Munan kurabe, “Al Kurunyen mere basan al bikkek hinhan go goyen kura yara,” yen hinhan. <sup>16</sup> Be, Herot gobe al belen Yesu nin gwaha mat mere ingogaha ugun po ten hinhan go nurdeb, “Yon binin walmeke kamyin al go gago



sopte huwaruŋ,” yiriŋ. <sup>17-18</sup> Yeŋ beleŋ gwaha yiriŋ gote miŋbe gahade: bikkeŋ Yon diwiliŋ hinhinya Herot beleŋ kuliŋ Filipyen berem Herodias kawem tiriŋ. Irkeb Yon beleŋ goke teŋbe, “Kolger bere kawem tawaŋ gobe gwaha ma tiyayiŋ yitiŋ goyen tiyaŋ,” ineŋ hinhin. Irkeb Herot beleŋ Herodias niŋ teŋbe meteŋ marminiŋ hulyaŋ yirke kuŋ Yon haniŋ fere teŋ tukuŋ koyare keramiŋ. <sup>19</sup> Gwahade geb bere gobe Yon niŋ biŋde igiŋ ma nurde unenbe, “Daha mat kura maymeke kamwoŋ?” yeŋ nurde hinhin. Gega yiŋgeŋbe epte moŋ. <sup>20</sup> Gobe Herot beleŋ Yonbe al huwak wor po, irde Al Kurunyen meteŋ al fudinde wor po yeŋ keneŋbe palap irde asogo maynayiŋ yeŋ keŋkela doyaŋ irde hinhin geb, gogo epte ma bere gore mayke kamtek hinhin. Herotbe Yon beleŋ saba irke kandukneŋ nurde hiyen gega, sabamiŋ go nurtek po irde hiyen.

<sup>21</sup> Be, Herodias beleŋ, “Daha mat kura Yon mayeŋ?” yeŋ nurde hinhin goyen nalu go forok yiriŋ. Herot go miliŋ kawaŋ kiryiŋ nalu goke teŋbe biŋge kuruŋ teŋbe yende meteŋ mar gote doyaŋ mar hoy yirke wayamiŋ. Fuleŋa marte doyaŋ marya Galili naŋa doyaŋ irde haŋyen marya manaŋ yinke yende yare gabu iramiŋ. <sup>22</sup> Goyen nalure Herodias wiriŋ beleŋ gabu kurunde gor Herotya kadom yagoya biŋge nene hinhande gor waŋ tikiŋ heŋ gege igiŋ wor po tiyyiŋ. Irkeb gor gabu iramiŋ mar goya Herotya amaŋ hamiŋ. Irdeb Herot beleŋ amaŋ heŋbe bere goyen, “Det kuraŋ nurdeb mali po gusuŋaŋ nirayiŋ. Irkeb igiŋ gunen geb,” inyiŋ. <sup>23</sup> Irdeb,

“Fudinde wor po ginhem. Naŋa ne beley doyan irde hime ga manan iŋin kurhan tubul teŋ gun-meke doyan yirde hayin,” inyin.

<sup>24</sup> Irkeb bere go miliŋ hitte kuŋbe, “Da det nin gusunan hewen?” inkeb miliŋ Herodias beley, “Kuŋbe Yon tonan nin inayin,” inyin. <sup>25</sup> Irkeb bere go bemel po Herot hitte mulgan henbe, “Hanŋa ga po Yon binin walde tonan koronde kerde tawan nunayin,” inyin. <sup>26</sup> Gwaha inkeb Herot go kanduknen wor po nuryin. Gega hanŋapya kadom dilinde mere sanin po tiyyin goke memya henbe Herodias wirin gote mere po gama iryin. <sup>27-28</sup> Irdeb goyare po meten almin unŋuren kura hulyan irke koyare kuŋbe Yon binin walde tonan teŋ koronde kerde tawan bere go unyin. Unkeb tukun miliŋ unyin. <sup>29</sup> Irkeb Yonyen komatmin beley mere momon go nurdeb wan Yon hakwam po tukun mete tiyamin.

*Yesu beley al 5,000 binŋe paka yiryin  
(Matiyu 14:13-21; Luk 9:10-17; Yon 6:1-14)*

<sup>30</sup> Be, komatmin 12 kwamin go mulgan hen gabu irdeb kalyan kerde mata tiyamin irde al saba yiramin goyen tumnan Yesu momon iramin.

<sup>31</sup> Gwaha teŋ hikeyab al budam po wan gabu irke binŋe netek ma hamin. Irkeb Yesu beley, “Den po wake kuŋ usan hetek nanare kura neya balmin hiniŋ,” yinyin. <sup>32</sup> Be, gwaha yinenbe tumnan hakwa hende hurkun nanan al minmonde kwamin. <sup>33</sup> Gega Yesuya komatminya go al buda kurun go yubul teŋ kukeb nanan gor kunin tahan yen bebak tiyamin. Niŋgeb taun buda kurun bana go nin marbe Yesuya komatminya kunin teŋ

hinhan gasunđe gor yeŋ wa kuŋ forok yamiŋ.  
<sup>34</sup> Be, Yesu waŋ forok yeŋ yeneŋbe al buda kurun go dirin kagew yara buninŋ yinyin. Irdeb det budam nin saba yiryin.

<sup>35-36</sup> Saba yirke kuŋ kuŋ wawunbana wor po hiriŋ. Irkeb komatmin belen waŋbe, “Kidoma dura, irde naŋa gaŋbe tiyun binde minmon. Niŋgeb al buda ga yakira tike kuŋ tiyunyan ma metenyan gwahade yinŋen binde kura nankenen damu ten nenayin,” inamin. <sup>37</sup> Gwaha inkeb Yesu belen, “Mon, den belen binde kura yunke nenan,” yinyin. Irkeb komatmin belen, “Al buda kurun gabe dahadem binde yuntek? 200 denari\* ten gore binde damu ten yunnin yeŋ dinen ha?” inamin. <sup>38</sup> Gwaha inkeb wol henbe, “Bingetinbe dahade han? Kuŋ yennan,” yinyin. Irkeb kuŋ yeneŋbe, “Beretbe siptesonon, irde makan dapŋa yadibe irawa ga han,” inamin. <sup>39</sup> Irkeb Yesu belen, “Al gabu kurun go pota yirke kuŋ yamunyan go keperde tukunan,” yinyin. <sup>40</sup> Irkeb pota yirke keperamin goyen gabu kurabe 50, munan kurabe 100 gwahade ala po keperde tukamin. <sup>41</sup> Irkeb Yesu belen beret siptesononya makan dapŋa yadi irawaya goyen yade Al Kurun igin nurd unenbe beret go yubala ten komatmin yunin. Irkeb komatmin belen yade yukun al buda go yunamin. Makan dapŋa manan gwahade po iryin. <sup>42</sup> Be, al buda go nenebe ep wor po nuramin. <sup>43</sup> Irkeb komatmin belen binde diknen goyen gabu yiraminbe tiri 12 gayen makin yirtek

---

\* **6:37:** Denari: Yesu hinhin nalure hora denembe gogo. 200 denari gobe gagasi 8yen meten damu hora.

haminḡ. <sup>44</sup> Binḡe naminḡ mar al parguwak po kapyañ haminḡbe 5,000.

*Yesu fe yuwalḡeḡ hende huwarde komatminḡ hitte wayinḡ*

*(Matiyu 14:22-23; Yon 6:15-21)*

<sup>45</sup> Be, Yesu belḡ al buda go yakira tenḡbe goyare po komatminḡ yago goyen, “Deḡ wa hakwa hende meheḡ heḡ Betsaida kunayinḡ,” yinyinḡ. <sup>46</sup> Gwaha yineḡ yubul tenḡbe dugu dabayinḡ belḡ Al Kurunḡ mere ire yeḡ hurkurinḡ.

<sup>47</sup> Be, anne silsul irkeb hakwa gob fe ala kurunḡ kahalte forok yirinḡ. Goyareb Yesube yeḡ unḡkureḡ po dugu dabayinḡde gor hinhin. <sup>48</sup> Gor heḡyabe meḡe kurunḡ po huwarke hakwa go epte ma kutek hekeb mel goyen foy misineḡ po heḡ hinhan goyen yeneḡ hinhin. Irdeb naḡa minḡe hekeb kuḡ yeḡ yeḡ fe hende huwarde kuḡbe mel go fole yirde kweḡ tiyyinḡ. <sup>49-50</sup> Irkeb komatminḡ belḡ keneḡbe, “Unḡura waḡ hi!” yeḡ kafura heḡ kekew tiyaminḡ. Irkeb bemel po wol heḡbe, “Moḡ, ne waḡ hime geb, kafura ma! Tareḡ henaḡ!” yinyinḡ. <sup>51</sup> Gwaha yineḡbe hakwa hende hurkukeb meḡe kurunḡ goyen kamyinḡ. Irkeb komatminḡbe keneḡbe dilinḡ fot wor po yaminḡ. <sup>52</sup> Gobe Yesu belḡ al budam binḡe yunke naminḡ gote minḡ goyen tonañ tareḡ irde ma nuraminḡ geb, gogo mata tiyyinḡ go manañ bebak ma tiyaminḡ.

<sup>53-54</sup> Be, mel go kuḡ siḡa kurhan Genesaret taunde forok yaminḡ. Forok yeḡ hakwa tubul teḡ siḡare kurkukeb gor ninḡ al belḡ Yesu keneḡ bebak tiyaminḡ. <sup>55</sup> Irdeb buḡ yeḡ kuḡ Yesuyen

mere momon goyen tagalde tukukeb nanə kurun bana go nin mar beley garbam mar kurabe sapir hende yerde, kurabe yadeb Yesu tiyun damde kura hi yeke nurdeb gor po yukun hinhan. <sup>56</sup> Yesube tiyunyanya taunyanjabe tiyun muknej taun sinayan kun hikeb garbam mar maket gasunde gor yawan gabu yirde hinhan. Irdeb esen mere irde, “Yesu, ge beley igin yekeb amilge po sisa urdeb igin hetek,” inamin. Irdeb gwaha tenbe garbam mar go igin hen hinhan.

## 7

### *Yesu beley asiyen mata walde yunjin (Matiyu 15:1-9)*

<sup>1</sup> Be, Farisi marya Moseyen saba mar kuraya Yerusalem tubul ten katen Yesu hinhide gor gabu irde kalyan keramin. <sup>2-3</sup> Goyarebe Yesuyen komatmin yenaminbe hanin ma haldeya binje yanarde nene hinhan. (Yuda marte matabe hanin ma haltin gobe tikin minyan yen nurde mali ma dula ten hanjen. Ningeb yenbe asem yagot hanin hal hal belnen goyen gama irde hanjen. Farisibe goyen mata po kenkela gama irde hanjen mar. <sup>4</sup> Go mar gobe gabu karkuwanan al maliya suluk hen kun hinayin goyen wan yaminan henbe fe gemde ga dula ten hanjen. Matamin gwahade budam han. Kuraminbe gisu, koronja, fe kanguya hal hal belnen minyan. Mali mali ma ten hanjen.)

<sup>5</sup> Gwahade ningeb Farisi mar goya Moseyen saba marya beley Yesu gusunan iramin: “Danin geb komatge yagobe asininin yagot mata ma

gama irde hanij ma halde ga dula ten hanj?” in-aminj. <sup>6</sup> Irkeb Yesu belen wol henbe, “Den usi mar gahade gake tenbe bikken Aisaia belen asande kayyin gobe fudinde wor po. Mere kayyinbe gahade:

‘Al gabe mohonje po turun nirde hanj.

Gega bindebe ne nin ma wor po nurde hanj.

Hoyande wor po hanj.

<sup>7</sup> Mel gabe megen nin marte saba po gama irde al saba yirde hanj.

Mel gabe bin hende hende po dolon nirde hanj,’ yitin hi. *Aisaia 29:13*

<sup>8</sup> Denbe Al Kurunyen saba fudinde go yubul ten mata al belen forok yirtin go po ga tarej yanarde hanj,” yinyinj.

<sup>9</sup> Irde sopte yinyin: “Denbe asetin yagot mata goyen po gama irnin yenbe Al Kurunyen merebe dindiken ge nurdeb yad yigigiri yird yird dufay epte wor po hanj. <sup>10</sup> Ga dinen hime gate minbe gahade: bikken Mose belen, ‘Mamtinya nantinya palap yirde hinayin,’ yirin. Munan, ‘Al kura milinya naninya karan yuryen gobe al go mayke kamyen,’ yirin. <sup>11</sup> Gega denbe gwaha mat ma alya bereya saba yirde hanj. Gwaha titnenbe, ‘Dawet kura mamtinya nantinya yuntek goyen Al Kurun untek yinen go ma yunen hinayin,’ yen saba yirde hanjen. <sup>12</sup> Den belen gwaha mat saba yirde hikeb naninya milinya faran yurde hitek goyen gwaha ma yirde hanjen. <sup>13</sup> Irdeb asetin yagot mata gore bitin pet titin hanj geb, Al Kurunyen merebe dawet mali kura yara irde hanjen. Mata kurabe gago.

Mata budam hoyañ wor gwaha po ten hanjen,” yinyinj.

*Da det belenje Al Kurunj dilinde al bulunj iryen?  
(Matiyu 15:10-20)*

<sup>14</sup> Be, Yesu belen al gabu iraminj go hoy yirdeb sopte gaha yinyinj: “Merene kenkela palña irde minj nurnanj ko. <sup>15-16</sup> Binje daminbe iginj yitinj mere goya dula ten ten matatinja goyen kenkela ma gama irtekbe Al Kurunj dilinde bulunj dinyen yen hanjen gega, gore epte ma bulunj diryen. Dawet al binde forok yeke mata bulunj tiyyen gore gab bulunj iryen,” yinyinj.\*

<sup>17</sup> Be, al gabu kurunj go yubul ten kunj ya binde hurkunje komatminj yago belen siraw mere gote minj ninj gusunanj iraminj. <sup>18</sup> Irkeb Yesu belen, “Denj wor gwahade po, go ma nurde hanj? Dawet kura ten niyyen gore daha mat Al Kurunj dilinde bulunj iryen? Epte monj. <sup>19</sup> Det niyyen gobe kunj dufayminde ma kuyenj, araynende kunbe kat kuyenj,” yinyinj. (Mere gate minbe binjebe bulunj minjon, netek ala po yen yiryinj.)

<sup>20</sup> Be, Yesu belen saba goyen basanj henj gaha yinyinj: “Al binde mat dufay bulunj forok yen monde mat kat kuyenj gore gab Al Kurunj dilinde bulunj iryen. <sup>21</sup> Al binde matbe det bulunj gahade forok yen hanjen: dufay bulunj bulunenj, leplep mata, kawe mata, al gasa yirke kamde kamde mata, al berem yanj belen bere hoyanj duwan yird yird mata, <sup>22-23</sup> det ug po yad yad ninj dufay henj

---

\* **7:15-16:** Asanj hoyandebe gahade hi: “...tikiñ iryen. 16 Al kura nurtek kenem nuryen,” yinyinj.

heñ mata, al bulun yird yird dufay, al usi yird yird mata, uliñde po aman hetek dufay po gama ird ird mata, kadom igiñ mat hike yenenbe daniñ nenbe gwahade moñ yeñ nurd nurd mata, mere bulun mat ten ten mata, parpar mata, kumhaka mataya gore gab al biñde mat forok yeñ Al Kurun diliñde al go bulun irde hanyen,” yiniñ.

*Fonisia bereyen dufay sanij*  
(*Matiyu 15:21-28*)

<sup>24</sup> Be, Yesube tiyun go tubul ten Tair taun bindere kuriñ. Irde al belen gor hi yeñ nurd nurd goke bada heñbe ya kura goyen bana hurkun balmiñ goñ hinhin. Gega yeñ gor hi mere momoñ gobe gwaha mat kura bana kertek ma hiriñ. <sup>25</sup> Gwahade niñgeb bere kura wiriñ diriñ unğura ketal urtiñ gore Yesuyen mere momoñ nurdeb goyare po wañ Yesu kahañ miñde katen dokolhoñ yugulun tiyiñ. <sup>26</sup> Yeñbe Yuda mar bere moñ. Siria nañare niñ Fonisia taunde gor kawañ hiriñ. Be, bere gore wañ wiriñ unğura ketal urtiñ miñyan goyen Yesu belen unğura takira tiyyen yeñ esen mere iryiñ. <sup>27</sup> Irkeb Yesu belen Yuda marya al miñ hoyanya goke tagale yeñ maya mere mat gaha inyiñ: “Diriñ yubul tike yeñ wa biñge nenañ. Diriñde biñgebe kulu epte ma yuntek,” inyiñ. <sup>28</sup> Gwaha inkeb bere gore wol heñbe, “Be, Doyañ Al Kurun. Mere taha gobe fudiñde. Gega diriñ dula tike biñge dikneñ katkeb kulu wor nene hanyen,” inyiñ. <sup>29</sup> Irkeb Yesu belen, “Be niñ, mere gobe igiñ mat wol haha geb igiñge kwa. Unğura bulunbe werge tubul tiya geb,” inyiñ. <sup>30</sup> Irkeb bere gobe yamiñde



kuŋ wirinbe unğura go tubul teŋ kuke igin heŋ gasuŋde ferde hike kinyin.

*Yesu beleş al melak kandukya kirminŋ titminŋya sope iryin*

<sup>31</sup> Be, Yesu go Tair taun şınakyaŋ tiyuŋ haŋ goyen yubul teŋ Saidon taunde kuriŋ. Gor matbe kurkuŋ Galili fe ala kurunŋ şınayaŋ mat kuŋbe Dekapolis naŋare kuriŋ. <sup>32</sup> Irkeb kura mar beleş al kura kirminŋ titminŋ irde melak kanduk geb mere keŋkela ma teŋ hiyen al goyen teŋ yeŋ hitte waŋ haninŋ kerde sope ird unwoŋ yeŋ esenŋ mere iraminŋ.

<sup>33</sup> Irkeb Yesube al budam hinhan goyen yenenŋ al go muŋ po teŋ tapat irde haninŋ faw yade al gote kirminŋ bana yerdeb haninŋ meyaŋ irde al go melak sisaŋ uryinŋ. <sup>34</sup> Irdeb al go buninenŋ kenenbe Al Kurunŋ gusunŋan irdeb al go “Efata!” inyinŋ. (Mere gote miŋbe “Fegela!”) <sup>35</sup> Goyare po al go kirminŋ wuk yirinŋ, irde melak kanduk go hipirkeŋ heke mere keŋkela tiyyinŋ.

<sup>36</sup> Irkeb Yesu beleş al buda go, “Mata kenhanŋ gake tagalde ga ma!” yinenŋ hayhay yiryinŋ. Goyenbe hayhay yirmanŋ hiriŋ gega epte moŋ. Mata tiŋenŋ kenaminŋ goke tagalde tururu urde tukunŋ hinhan. <sup>37</sup> Yesu beleş kirminŋ titminŋya melak kandukya miŋyaŋ al sope iryinŋ goyen gote mere momoŋ nurdeb al budam hurkuŋkat teŋbe, “Yeŋ det yirde hi gob igin ala po. Kirminŋ titminŋya melak kandukya miŋyaŋ mar wor sope yirke igin heŋ haŋ!” yaminŋ.

## 8

*Yesu belen al 4,000 binje yunyiñ  
(Matiyu 15:32-39)*

<sup>1</sup> Be, Yesu go Dekapolis naña bana goñ hin-hin goya goyenbe al budam tebañ gabu iramiñ. Goyenbe binje go kura netek miñmoñ hekeb Yesu belen komatmiñ yago hoy yirde gaha yinyiñ: <sup>2</sup> “Nebe al buda ga bunineñ yeneñ hime. Neya hike kuñ kuñ yereñkek hihi. Irde bingem moñ geb, go kura netek miñmoñ hañ. <sup>3</sup> Al kurabe naña gisaw mat wayañ. Niñgeb binje nenmiñ moñ tiyuñtiñde kunañ yineñ gob kurabe kuñ belenyañ kamnayañ,” yinyiñ. <sup>4</sup> Gwaha yinkeb komatmiñ belen, “Tiyuñ binde miñmoñ bana gabe dare aran kuñ binje yawañ yuntek?” inamiñ. <sup>5</sup> Irkeb Yesu belen, “Binjebe dahade hañ?” yineñ gusuñañ yiryiñ. Irkeb, “Beretbe 7 hañ,” inamiñ.

<sup>6</sup> Gwaha inen yawañ unkeb Yesu belen al gabu iramiñ goyen, “Megen kepernañ,” yinyiñ. Irdeb beret 7 go yade Al Kurun igiñ nurd unen yubala teñ al gale yirnañ yeñ komatmiñ yago yunyiñ. Yunkeb komatmiñ yago belen al gale hen yunke namiñ. <sup>7</sup> Makaan dapña mukneñ kura goyen wor yade Al Kurun igiñ nurd unen komatmiñ yago yunkeb go wor al gale yirde tukamiñ. <sup>8</sup> Irkeb al buda kurun goyen binje go nene ep wor po namiñ. Irkeb Yesuyen komatmiñ yago belen binje dikneñ goyen gabu yiramiñ gobe tiri 7 gwahade mañiñ hetek hamiñ. <sup>9</sup> Gor binje namiñ mar goyen al parguwak po kapyañ hamiñbe 4,000. Be, Yesu belen al buda goyen yinke bur yamiñ. <sup>10</sup> Irkeb Yesuya komatmiñ yagoya hakwa

hende hurkunbe Galili fe ala kurun siŋa kurhan Dalmanuta nanjare kwamiŋ.

<sup>11</sup> Be, goŋ kukeb Farisi mar kura belen waŋ Yesu tunan urniŋ yenbe, “Al Kurunyen tarende mata tiŋen tunun yaŋ kura dikala dira,” inen gusunan iramiŋ. <sup>12</sup> Irkeb Yesu go binde kanduknen wor po nurdeb, “Daniŋ geb gayenter niŋ marbe Al Kurunyen mata tiŋen niŋ po gusunan nirde han? Fudinde wor po dinhem. Epte ma mata tiŋen kura dikala diren,” yinyiŋ. <sup>13</sup> Gwaha yinenbe yubul ten hakwa hende mulgan hen hurkun fe ala kurun goyen siŋa kurhan wor komatmiŋya kwamiŋ.

*Yesu belen Farisi marte mata niŋ maya mere mat yiriŋ*

*(Matiyu 16:5-12)*

<sup>14</sup> Goyabe komatmiŋbe binde yad yad niŋ bin sir yeke beret unken po ten kwamiŋ gobe hakware hinhin. <sup>15</sup> Be, hakwa hende kun henjabe Yesu belen Farisi marya Herotyat saba bulun gore alya bereya budam gote dufaymiŋ bulun irde hiyen goke saba yirde hayhay yirdeb, “Farisi marya Herotyat mata niŋ kenkela hen ga hinayiŋ. Gobe yis\* yara geb,” yinyiŋ. <sup>16</sup> Gwaha yinkeb komatmiŋ belen, “Binde kura ma yade wayhet goke tenbe gago dina,” yen yingen uliŋ sege iramiŋ. <sup>17</sup> Irkeb Yesu belen yenen bebak tenbe gusunan yiriŋ. “Daniŋ geb bingeniniŋ miŋmon yen han? Da belen bitiŋ pet ten hike dufaytiŋ mun kura ma

---

\* **8:15:** Yisbe dirnen mun kura palawa bana kerkeb hilyan kuyen go gwahade yara Herotyia Farisi maryat mata bulunbe gwahade goke Yesu belen hayhay yiriŋ.

wuk yeŋ hi? <sup>18</sup> Diwiltingya kirmiŋtingya minyan gega, daniŋ mata teŋ hime gayen neneŋ nurde bebak ma teŋ haŋ? <sup>19</sup> Beret siptesoŋoŋ yade yubala teŋ dunmeke 5,000 al yunaŋ gote dikŋeŋbe tiri dahade maŋiŋ yirtek goyen gabu yiraŋ?” yinyiŋ. Gwaha yinkeb, “Tiri 12,” inamiŋ. <sup>20</sup> Irkeb sopte po, “Munaŋ beret 7 yade yubala teŋ dunmeke 4,000 al yunhaŋ gote dikŋeŋ gabu yirhaŋ gobe tiri dahade maŋiŋ hetek hahaŋ?” yinkeb, “Tiri 7,” inamiŋ. <sup>21</sup> Gwaha inkeb, “Go yeneŋbe dufaytiŋ muŋ kura ma wuk yeŋ hi?” yinyiŋ.

*Yesu beleŋ Betsaida niŋ al diliŋ titmiŋ kura sope iryiŋ*

<sup>22</sup> Be, Yesuya komatmiŋya gob kuŋ Betsaida taunde forok yamiŋ. Irkeb al kura beleŋ al diliŋ titmiŋ kura goyen tawaŋbe, “Al ga sope ird ird niŋ sisaŋ ura,” ineŋ eseŋ mere iramiŋ. <sup>23</sup> Irkeb Yesu beleŋ al diliŋ titmiŋ goyen haniŋde tanarde tiyuŋ siŋare tukuriŋ. Tukuŋbe diwiliŋde meyaŋ teŋ haniŋ beleŋ busaŋ heŋbe, “Det kura yenha?” ineŋ gusaŋaŋ iryiŋ. <sup>24</sup> Gusuŋaŋ irke naŋkeneŋ tukuŋbe, “Albe he yara yeneŋ himeke kuŋ waŋ teŋ haŋ,” inyiŋ. <sup>25</sup> Irkeb sopte po Yesu beleŋ al go diliŋ hende haniŋ kiryiŋ. Irde haniŋ tubul tikeb diliŋ hol irde naŋkinyiŋ. Irdeb diliŋ wuk yeke keŋkela wor po dawet yinyiŋ. <sup>26</sup> Irkeb Yesu beleŋ, “Betsaida taunde gar ma mulgaŋ heŋ kwayiŋ,” inkeb yamiŋde kuriŋ.

*Pita beleŋ Yesube al gwahade yeŋ tagalyiŋ  
(Matiyu 16:13-20; Luk 9:18-21)*

<sup>27</sup> Be, Yesu go komatminḡ yagoya Betsaida taun goyen tubul teḡ Sisaria Filipai taun gote sinḡkyaḡ tiyuḡ mukḡḡ mukḡḡ goyen fole yirde kuḡ heḡyabe, “Ne gakeb al beleḡ ganuḡ yeḡ haḡ?” yineḡ komatminḡ gusuḡḡ yiryiḡ. <sup>28</sup> Irkeb komatminḡ beleḡ wol heḡbe, “Al kura beleḡ gebe Yon Baptais, kurabe Elaia, munḡḡ kurabe Al Kurunḡyen mere basḡḡ al kura yeḡ haḡ,” inamiḡ. <sup>29</sup> Irkeb Yesu beleḡ, “Munḡḡ denḡbe daha yeḡ haḡ?” yinkeb Pita beleḡ wol heḡbe, “Gebe Me-saia,” inyiḡ. <sup>30</sup> Gwaha inkeb Yesu beleḡ, “Al kura momoḡ ma yirḡnayiḡ,” yineḡ hayhay yiryiḡ.

*Yesu beleḡ kamde kamdeḡḡ ge bebak yiryiḡ  
(Matiyu 16:21-28; Luk 9:22-27)*

<sup>31</sup> Be, Yesu go saba yirde heḡyab gaha yinyiḡ: “Ne Al Urmiḡḡ gabe ulne misiḡḡ kurunḡ kateḡ. Irkeb Yuda marte doyaḡḡ mar parḡḡwakya Al Kurunḡḡ dolonḡ ird ird mata doyaḡḡ marte karkuwaḡḡmiḡya Moseyen saba marya kurunḡḡ goreb ne niḡḡ biḡḡ ar yekeb sabane nurtek ma yirkeḡḡ mununke kameḡḡ. Goyenbe yereḡḡkek hekeḡḡ sopte huwareḡḡ,” yinyiḡ. <sup>32</sup> Yeḡḡbe mere keḡḡkelak po bebak yiryiḡ. Irkeb Pita beleḡ, “Geya muḡḡ kura mere tiyye,” ineḡ Yesu yeḡḡ muḡḡ po teḡḡ tapat irde ineḡḡ teḡḡbe, “Mere taha gobe igiḡḡ ma nurhem,” inyiḡ. <sup>33</sup> Irkeb Yesu beleḡḡ piḡeḡḡ nurd uneḡḡ harhok uneḡḡbe komatminḡḡ hoyḡḡḡ goyen yeneḡḡ heḡya Pita goyen ineḡḡ teḡḡbe, “Satan, waḡḡ harhokne beleḡḡ kwa! Begerbe alyen dufay beleḡḡ po maḡiḡḡ hitiḡḡ hi. Al Kurunḡyen dufay niḡḡ ma nurde ha,” inyiḡ.

<sup>34</sup> Gwaha inenbe al buda kurun gor hinhan goyen hoy yiriyin. Irkeb wan komatminya gabu irde keperamin. Irkeb Yesu belen tumnande gaha yinyin: “Al kura ne gama nire yen nurdeb yingen ge ma nurde ne nin ten igin kanduk ten kamen yen nurde gab gama niryen. <sup>35</sup> Ningeb al kura yingen ge po nurde hiyenbe Al Kurun belen pinen nurde unkeb Al Kurunyen dirin ma hiyyen. Gega al kura neya merenya nin nurde goyen goke kanduk tiyyen gobe Al Kurun belen igin nurde unyen. <sup>36</sup> Al kura merene ma gama irde megen nin samun yade pipkatoka irde, ‘Ne ep hihim,’ yen nuryen gega, kame kamde kak alare kuyen gobe igin ma dahade? Gobe igin mon. <sup>37</sup> Al kura kak alare kuyenbe dahadem detmin gore kak alare mat tumulgan tiyyen? Go wor epte mon. <sup>38</sup> Al Kurun harhok unen mata bulun po ten han nature gayen al kura ne nin memya hen merene ma tagalde hiyen gobe kame ne Al Urmin gare wor Nanner taren turnun yan ten miyonmin wukken wor po goya katenya goyenbe al gote matamin goyen wol henbe yen ge memya hewen,” yinyin.

## 9

<sup>1</sup> Be, Yesu go gwaha yinenbe, “Fudinde wor po dinhem. Den gar huwarde han gayen kuratin kurabe go ma kamdeya Al Kurun belen alya bereyamin doyan yird yird goyen sanin minyan forok yeke kennayin,” yinyin.

*Yesu ulin hoyan hirin  
(Matiyu 17:1-13; Luk 9:28-36)*

<sup>2</sup> Be, gor mat nanja fay 6 hubu hekeb Yesu belen komatmiñ karwo Pita, Yonyabe Yemsysa po yade dugu kurunđe kura gor hurkuriñ. Gorbe yeñ po hinhan. Irkeb Yesu go mel gote diwiliñ mar po uliñ hoyañ heke kenamiñ. <sup>3</sup> Irkeb Yesuyen uliñhor yerde hinhin gobe tukfor yeñ faykek wor po heñbe sornon minyañ hiriñ. Megen niñ al belen det kura halke epte ma wor po gwahade hiyyeñ. <sup>4</sup> Gwaha teñ hikeb goyare po Moseya Elaiaya forok yeñ Yesuya mere teñ hike komatmiñ belen yenamiñ. <sup>5</sup> Irkeb Pita belen, “Tisa, garbe igiñ wor po niñgeb, ya yok karwo yirtek. Kurabe ge niñ, kurabe Mose niñ, irde kurabe Elaia niñ,” inyiñ. <sup>6</sup> Go inyiñ gobe Pitaya kadam waranya goyen kafura wor po heñbe gwaha kura yihim yeñ ma nurdeya gogo mali ga mere tiyyiñ. <sup>7</sup> Irkeb goyare po gagap kura forok yeñ alu yuriñ. Gagap bana gonbe al melak kura nuramiñ. Meremiñbe gahade: “Gabe Urne. Yeñbe bubulkunne wor po. Niñgeb yende mere po nurde gama irde hinayiñ,” yiriñ. <sup>8</sup> Be, mere go nurdeb goya goyen po nankenamiñ gega al kura ma kenamiñ. Yesu po hike kenamiñ.

<sup>9</sup> Be, Yesuya komatmiñya gobe gasuñ hinhan goyen tubul teñ mulgañ heñ katamiñ. Katen henya be Yesu belen, “Mata kenhañ gake al hoyañ kura momoñ ma yirnayiñ. Ne Al Urmiñ gare metere mat huwareñ goyare gab momoñ yir-nayiñ,” yineñ hayhay tareñ po yiriñ. <sup>10</sup> Irkeb meremiñ go nurdeb komatmiñbe yinğeñ uliñ, “Al kamtiñbe dahadem metere mat huwaryeñ?” yeñ kadam gusuñañ gird tiyamiñ. <sup>11</sup> Irdeb, “Munan

danin geb Moseyen saba mar beleŋ al kura Elaia beleŋ meten ten hinhin gwahade meten titek al go wa mehen heŋ wake gab Mesaia wayyen yen hanŋen?” inen Yesu gusunen iramin. <sup>12-13</sup> Irkeb Yesu beleŋ wol henbe gaha yinyin: “Al kura Elaia yara meten titek al go wa mehen heŋ waŋ det sope iryen yen hanŋen gobe fudinde. Goyenbe al gobe yen wa bikken wayun. Irkeb Al Kurunyen asande mere kayamin gwahade goyen po al beleŋ gwaha irtek yen nurde hinhan gwahade po bulun bulun iran. Niŋgeb ne Al Urmin gayen wor Al Kurunyen asande mere kayamin gwahade po kanduk kurun ten ulne misin katen kamen,” yinyin.

*Yesu beleŋ dirin unŋura minyan sope iryin  
(Matiyu 17:14-21; Luk 9:37-43a)*

<sup>14</sup> Be, mel goyen mulgan heŋ katenbe al buda kurun gabu irtin bana gon Yesuyen komatmin hoyan goya Moseyen saba marya kadom monde ten hike yenamin. <sup>15</sup> Gor gabu iramin mar gobe Yesu wayen tiya yen ma nurde hikeya wake kenenbe hurkunŋat wor po tenbe pere irnin yen kup yen kwamin. <sup>16</sup> Irkeb, “Danin kadom monde ten hanŋ?” yinen gusunen yiryin. <sup>17</sup> Irkeb gabu kurun bana gor al kura beleŋ wol henbe, “Tisa, urne unŋura beleŋ ketal urke mere ma ten hiyen goyen ge hitte ten wayhem. <sup>18</sup> Kurarebe unŋura gore ten megen temeyke dadilok monde ala heŋ misin ninedek irde ulin horam heŋ hiyen. Komatge yago gayen, ‘Unŋura go takira tinaŋ,’ yinhem gega yenbe epte monŋ,” inyin. <sup>19</sup> Irkeb Yesu beleŋ meremin goyen wol



henbe, “Denbe dahade? Dufaytin taren mon. Gayak ga denya hityen? Dirin go tawanan,” yinyin.

<sup>20</sup> Be, dirin go Yesu hitte tawayamin. Tawakeb unğura gore Yesu kenej goyare po dirin go hambor irde ten megen kan kan irkeb dadilok hol yirin. <sup>21</sup> Irkeb Yesu belen dirin naniñ goyen, “Garbam ga daha nanja tirin?” inen gusunjan iryin. Irkeb wol henbe, “Dirin hanjapok hinhinya po. <sup>22</sup> Unğura belen maymeke kami yen fe alaya kak alaya bana ten temeyde hiyen. Niñgeb ge epte kenem buninen dirde faran dura,” inyin. <sup>23</sup> Gwaha inkeb Yesu belen wol henbe, “Taren minjon yen nenen gusunjan nirde ha? Al kura ne nin dufaymin sanin irde hiyenbe det kura epte ma metenen iryen,” inyin. <sup>24</sup> Irkeb naniñ belen goyare po wol henbe, “Dufayne ge nin taren irhem geb, faran nurke dufay budam budam ma hewen,” inyin.

<sup>25</sup> Be, Yesu go al buda goyen wan gabu irke yenenbe unğura goyen inen tenbe, “Kirminj titminya mohonj kattinyat unğura, ne gare ginhem, dirin ga tubul ten kat kwa! Irde ma wor po mulgan hawayin!” inyin. <sup>26</sup> Irkeb unğura go kekew ten dirin goyen hambor bulun po irde tubul ten kat kurin. Dirin go kenaminbe ugalam mon, kamtin yara heke kenenbe al kura belen, “Ey, kama!” yamin. <sup>27</sup> Gega Yesu belen haniñde tanardeb isan heke huwaryin.

<sup>28</sup> Be, go kamere Yesube komatminya ya binde hurkamin. Hurkunbe komatmin yago belen, “Dahade niñgeb nenbe unğura go takira titekeb

mereniniŋ ma nura?” ineŋ gusuŋaŋ iramiŋ. <sup>29</sup> Irkeb Yesu belen wol heŋbe, “Uŋgura gahade gab Al Kurun gusuŋaŋ irke tareŋ dirke gab igiŋ takira tinayiŋ,” yinyiŋ. <sup>30</sup> Be, Yesube al yeneŋ yilwa yirde balmiŋ kuŋ hiniŋ yeŋ nurdeb tiyuŋ go tubul teŋ balmiŋ Galili naŋa goyen fole iramiŋ. <sup>31</sup> Gobe komatmiŋ buda goyen saba yirde hinhin geb gogo tiyyiŋ. Yeŋbe komatmiŋ saba yirde heŋyabe, “Ne Al Urmiŋ gabe al kura belen tagalde nunke megen niŋ al belen nad buluŋ buluŋ nirde mununke kamen. Gega yereŋkek hekeb sopte huwareŋ,” yinyiŋ. <sup>32</sup> Goyenpoga komatmiŋ yagobe mere gote miŋ bebak ma tiyamiŋ. Irdeb miŋ goyen tagalke buluŋ nurtek yeŋbe gusuŋaŋ ird ird niŋ kama hamiŋ.

*Ganuŋ albe deŋem kurun wor po?*  
*(Matiyu 18:1-5; Luk 9:46-50)*

<sup>33</sup> Be, Yesuya komatmiŋya Kapeneam taunde forok yamiŋ. Irdeb ya bana hurkuŋbe, “Belenbe daniŋ kadom mohonde tahaŋ?” yineŋ komatmiŋ yago gusuŋaŋ yiryiŋ. <sup>34</sup> Goyenpoga mel gobe waŋ heŋya, “Ganuŋbe folek geb, doyaŋ al hiyyeŋ?” yeŋ kadomde tiyamiŋ geb, goke memya heŋ mere ma tiyamiŋ. <sup>35</sup> Irkeb Yesu go keperdeb komatmiŋ 12 tumŋaŋ hoy yirdeb, “Be, al kura, ‘Al Kurun diliŋde deŋne yaŋ hewe,’ yiyyeŋbe yiŋgeŋ ge ma nurdeb al hoyaŋ kurun gote meten almiŋ hiyyeŋ,” yineŋ saba yiryiŋ. <sup>36</sup> Irdeb Yesu belen diriŋ diriŋeŋ kura komatmiŋ yago hinhande gor hinhin goyen teŋ besa irdeb, <sup>37</sup> “Ne niŋ teŋ al buluŋeŋ kura diriŋ gahade gayen gargar iryeŋ gobe ne niryeŋ. Munan al kura ne igiŋ igiŋ niryeŋ

gobe ne po ma niryen. Nad nerke wamirin al goyen manan igin igin iryen,” yinyin.

<sup>38</sup> Irkeb Yon belen nurdeb, “Tisa, al kura nende al mon gega, denger unğura yakira ten hike kenenbe utan irtin,” inyin. <sup>39</sup> Irkeb Yesu belen wol henbe, “Utan ma irnayin. Al kura ne denner Al Kurunyen saninde mata tinen turun yan forok iryen gobe daha mat tigiri ten bulun niryen? Epte mon. <sup>40</sup> Al kura asogo ma diryen al gobe nende al. <sup>41</sup> Fudinde wor po dinen hime. Al kura den denenbe Mesaiyen albe gago yen bebak tenbe ne nin ten fe kura dunyen gobe murungem tiyyen wor po,” yinyin.

<sup>42</sup> Be, Yesu belen sopte gaha yinyin: “Goyen-poga dirin gahade gayen ne nin dufay hekeya al kura belen mata bulun tiyi yen bin tiyyen al gwahade gobe hora kurun kura ten bininde fen ten makan alare temeytek yara. <sup>43-44</sup> Ningeb hange kura mata bulunde gukukeb walayin. Hange unğuren po ten Al Kurun hitte hurkayin wor igin. Mon go hange irawakde hiriryen gore kak kamde ma hiyen bana gon gukuriryen.\* <sup>45-46</sup> Kahan ge kura belen mata bulunde gukukeb walayin. Kahan ge titmin hen Al Kurun hitte hurkayin wor igin. Mon go irawakde hiriryen gobe gore kak alare gukuriryen. Ningeb hangeya kahan ge ya kurhan kura waltinenbe mata bulun huginen yubul tiyayin gogo.† <sup>47</sup> Delge kura belen mata

\* **9:43-44:** Asan kurarebe: ... gukuriryen. 44 Gorbe kundu huginen benbon ten hinayin. Irdeb kak gobe go ma kamde hiyen.

† **9:45-46:** Asan kurarebe: ... gukuriryen. 46 Gorbe kundu huginen benbon ten hinayin. Irdeb kak gobe go ma kamde hiyen.

bulunḡe gukukeb marayin. Delge unḡkuren po henya Al Kurun hitte hurkayin wor igin. Monḡo delge tumin hiriryen gobe gore kak ala bana gukuriryen. <sup>48</sup> Gorbe kundu huginen benbon ten hanyen. Irdeb kak gobe go ma kamde hiyen. <sup>49</sup> Dapḡa faw urke bida ma hen ulyanḡe po hanyen go gwahade goyen, kak alare han mar kurun gobe kak beḡen huginen kunga yirtinḡe gwahade po hinayin. <sup>50</sup> Be, fawbe det igin gega, hapek hubu hekeb daha mat hapek go sopte gasunen irnayin? Niḡeb dindiken goyen faw hapek minyan gwahade yara hen gab hinayin. Irdeb bitin kamke awalikde po hinayin,” yinyin.

## 10

*Ire unya hen hen mata*

*(Matiyu 19:1-12; Luk 16:18)*

<sup>1</sup> Be, Yesuya komatmin yagoya taun go tubul ten Galili nanare mat Yudia nanare kwamin. Irdeb gor mat kun Yodan fe sinḡa kurhan Perea nanare kwamin. Kukeb al budam sopte yen hitte wan gabu iramin. Irkeb yende matabe gwahade go niḡeb saba yiryin.

<sup>2</sup> Gwaha ten hikeyabe Farisi mar kura wan tunḡan urnin yenbe, “Al beḡen berem takira tiyyen gobe Moseyen sabareb mata huwak yitin?” inen gusunḡan iramin. <sup>3</sup> Irkeb Yesu beḡen wol henbe, “Goyen mata gokeb Mose beḡen asanḡe daha ten hinayin yen kayyin?” yinyin. <sup>4</sup> Irkeb mel gore wol henbe, “Moseyen sabarebe, ‘Al kura berem takira tiye yenbe igin asan kan unenbe takira tiyyen,’ katin hi,” inamin. <sup>5</sup> Irkeb Yesu beḡen, “Tonanḡin

tareñ wor po saba ma nurtek goke teñbe Mose belen asañ gogo kañ dunyiñ. <sup>6</sup> Gega hanjkapya wor po Al Kurun belen megenya nanñiya irde det kurun gayen yiryinyabe al irde bere irde iryiñ. <sup>7</sup> Gwahade niñgeb albe naninya miliña yubul teñ kuñ beremya gabu hiriryen. <sup>8</sup> Irdeb irawa goyen unjkuren po hiriryen. Niñgeb irawa goyen hoyañ hoyañ ma hiriryen. Unjkuren po hiyyen. <sup>9</sup> Gwahade geb Al Kurun belen bereya alya gabu hen hen mata goyen irtiñ go den al belen epte ma walde bur yirnayiñ,” yinyiñ.

<sup>10</sup> Be, sopte hurkun ya binde henyabe komatmiñ yago belen mere goke gusunañ iramiñ. <sup>11</sup> Irkeb Yesu belen wol henbe, “Al kura berem takira teñ bere hoyañ tiyyen gobe Al Kurun belen al gobe berem bikkek tubul teñ leplep mata tiya yen kinyen. <sup>12</sup> Bere kura un mekerde al hoyañ tiyyen gobe Al Kurun belen bere gobe un bikkek tubul teñ leplep mata tiya yen kinyen,” yinyiñ.

*Yesuya diriñ mukñenya*  
(*Matiyu 19:13-15; Luk 18:15-17*)

<sup>13</sup> Be, al kura mar belen diriñmiñ mukñen goyen Yesu belen haniñ tonañde yerde tareñ hen hen ge guram yiri yen yawañ hikeyabe komatmiñ yago belen al goyen yinen tiyamiñ. <sup>14</sup> Gwaha yirke yenenbe Yesu go biñ ar yekeb komatmiñ wen goyen gaha yinyiñ: “Diriñ mukñen go yubul tike ne hitte wanañ. Utañ yirde ma. Al kura Al kurunyen diriñ wor po hiniñ yenbe diriñ mukñen yara henayiñ. <sup>15</sup> Gabe fudinde wor po dinen hime. Diriñbe taynen yufuk bana hañ gwahade goyen al kura Al Kurunyen yufuk bana hime yen

ma nuryenbe epte ma Al Kurunyen dirinj hiyyen,” yinyinj. <sup>16</sup> Gwaha yinenbe dirinj muknen go yade besa yirde haniñ tonanyañ yerde guram yirde sañinj yiryinj.

*Samunmin budam minyañ al*  
(*Matiyu 19:16-30; Luk 18:18-30*)

<sup>17</sup> Be, Yesube gor mat hako ga kwen ten hikeyabe al kura kup yen wañbe kahan minde katen dokolhon yugulun tenbe, “Tisa, gebe al iginj. Goyenbe neb daha ten gab iginj Al Kurunyen dirinj wor po hewen?” inen gusunañ iryinj. <sup>18</sup> Irkeb Yesu belen wol henbe, “Gebe ne nenenbe megen nin saba al iginj kura yen nurd nunen ha? Mon, nebe megen gar nin mon. Megen nin al kura iginj minmon, Al Kurun mun po gab iginj. <sup>19</sup> Gebe Moseyen sababe nurde ha. Al ma gasa yirke kamnayinj, bere hoyañ kura duwan ma yirde hayinj, kawe ma ten hayinj, al usi ma yirde hayinj, al usi yirde detmin ma yade hayinj, momkeya nanakeya palap yirde hayinj,” inyinj. <sup>20</sup> Irkeb al goreb, “Tisa, ne dirinj henya po saba goyen nurde gama irde wañ wañ gago hime,” inyinj. <sup>21</sup> Irkeb Yesu belen al go kenenbe binde bubulkunne wor po yen nurde unenbe, “Gebe dawet unkuren po son hen ha geb, kun samunge tumñañ yukun al buninen det minmon mar goyen yunen tukayinj. Irkeb Al Kurun belen nere hihi yen ginyen. Irke gab wañ gama nirayinj,” inyinj. <sup>22</sup> Gega al gob samunmin budam wor po geb, mere goke kanduknen nurdeb bin bida heke kurinj.

<sup>23</sup> Gwaha tike kenenbe Yesu go komatmin yago goyen, “Al samunmin budam minyañ marbe Al

Kurun dirnen wen hen henbe metenen wor po,” yinyin. <sup>24</sup> Be, mel gob al samunmin budam gobe Al Kurun belen guram irkeb gogo yen nurde hanyen geb, mere go nurdeb dinon kok yamin. Irkeb Yesu belen gaha yinyin: “Mel, Al Kurun dirnen wen hen henbe metenen wor po. <sup>25</sup> Dapna kurun kamel belen amel haran hen hen kutum yamen dirnen mun wor po goyen bana epte ma hurkuyen. Gwahade goyen po al samunmin budam wor Al Kurun belen alya bereyamin doyan yirde hi bana gon epte ma hurkunayin. Ningeb dawet irawa gobe tumnande metenen gega, daminbe metenen wor po? Gobe samunmin budam minyan al gore Al Kurun belen alya bereyamin doyan yirde hi bana gon hurkun hurkun gobe metenen wor po,” yinyin. <sup>26</sup> Gwaha yinkeb komatmin gob hurkun kat tenbe, “Ningeb ganun po ga epte Al Kurun dirnen wen henayin?” yen yingen ulin kadom gusunon gird tiyamin. <sup>27</sup> Irkeb Yesu belen yenenbe, “Gobe alyen tarenbe epte mon. Gega Al Kurunyen tarenbe epte. Al Kurunbe al belen metenen nurde han goyen ingin ala yiryen,” yinyin.

<sup>28</sup> Be, gwaha yinkeb Pita belen, “Nenbe gama girnin yen detninin tumnan yubul titirin,” inyin. <sup>29-30</sup> Irkeb Yesu belen gaha yinyin: “Fudinde wor po dinen hime. Al kura neya ne nin yitin mere ingin ya goke ten yamin, kulin ya itin ya, haymin ya babam ya, milin ya nanin ya, dirnen wen, irde metenmin yubul tiyyen al gobe megen hiyen ya gayen wolminenbe det yubul tiyyen goyen folek kurun wor po yawaryen. Gega go

hendebe kanduk manañ tenj hiyen. Irdeb kame Al Kurunya awalik henj yenya huginen hiriryen. <sup>31</sup> Goyenpoga al budambe al hoyañ folek deninin yanj yenj nurde hañ mar gobe Al Kurunj belen denem monj yiryen. Munañ al kura al malinen yenj nurde hañ marbe Al Kurunj belen denem yanj wor po yiryen. Gobe al budam mehenj henayin marbe kame wor po henayin, munañ al kamere hañ marbe mehenj henayin go gwahade goyen,” yinyin.

*Yesu kamde kamde minj ge sopte momonj yiryin  
(Matiyu 20:17-19; Luk 18:31-34)*

<sup>32</sup> Be, Yodan fe tubul tenj Yerusalem hurkunj henyabe Yesu go mehenjde kunj hinhin. Irkeb komatminjbe Yesu go Yerusalem hurkunj hurkunj ninj kafura ma henj kunj hike kenenjbe dilinj fot yaminj. Irkeb al hoyañ kame gama irde hinhan mar go manañ kafura haminj. Irkeb Yesu gore sopte komatminj munj po yapat yirdeb mata gwahade forok yenj nunyenj yenjbe goyen goke gaha yinyin: <sup>33</sup> “Nenj Yerusalem hurkunj hite gayenbe ne Al Urminj gayen gor ninj mar belen Al Kurunj dolonj ird ird mata doyanj marte karkuwanminjya Moseyen saba maryat haniñde nernayin. Irkeb mel goreb kamyen po yenjbe nad Yuda mar monj al minj hoyañ haniñde nernayin. <sup>34</sup> Irkeb mel gore sukal nirde meyanj nirde nusulak tenj tenjbe mununke kamenj. Goyenbe yerenkek hekeb huwarenj,” yinyin.

*Yemsya Yonyat gusunanj  
(Matiyu 20:20-28)*



<sup>35</sup> Be, Sebedi urmiñ warañ Yemsya Yonya belen Yesu hitte wañbe, “Tisa, dawet kurañ gusunañ giryekeb igiñ irde dunayiñ?” inaryum. <sup>36</sup> Irkeb Yesu belen, “Da ird duni yeñ nineñ har?” yeñ gusunañ yiryiñ. <sup>37</sup> Gwaha yinkeb wol heñbe, “Gebe denge turñañ yañ hiyyeñya goyenbe deyya wa denđereñ yañ dirayiñ. Irkeb geya sosora heñbe al doyañ yirde hitek,” inaryum. <sup>38</sup> Irkeb Yesu belen, “Meretiriñ gobe miñ ma nurde heñya gusunañ nirde har. Niñgeb ne belen Al Kurunyañ dufay gama irde kanduk teweñ gwahade goyen der manañ igiñ tiriryen?” yinyiñ. <sup>39</sup> Irkeb wol heñbe, “Deyya epte,” inaryum. Irkeb Yesu belen gaha yinyiñ: “Ne belen Al Kurunyañ dufay gama irde kanduk kurañ teweñ gwahade gobe der wor igiñ tiriryen. <sup>40</sup> Gega denđiriñ yañ heñ ketalner derd derd sañiñ pota irde duneñ duneñ gobe nere meten moñ. Tareñ gobe Al Kurañ belen al basaña yirtiñ mar goyen yunyañ,” yinyiñ.

<sup>41</sup> Be, komatmiñ kadam 10 gore mere go nurdeb Yemsya Yonya niñ biñ ar yamiñ. <sup>42</sup> Irkeb Yesu belen tumñañ hoy yirdeb gaha yinyiñ: “Megen niñ doyañ mar karkuwañbe al doyañ yirhet usi ten yinğen ge po nurde kanduk yuneñ hañyen. Irde yende meten marmiñ manañ denđiniñ yañ hihit yeñ nurdeya al kanduk yuneñ hañyen. <sup>43</sup> Gega denbe gwahade moñ. Al kura den hañ bana gayen fole dirde ne po denne yañ hewe yeñ nuryen al gobe yinğen ge ma nurde dende meten al po hiyyen. <sup>44</sup> Niñgeb al kura doyañ al hewe yeñbe yinğen ge ma nuryen. Irde almiñ ge po dufay heñ yende meten al po hiyyen. <sup>45</sup> Gwahade

ninḡeb ne Al Urminḡ gayen wor al belenḡ iginḡ iginḡ nirnanḡ yeḡ ma katminḡ. Ne belenḡ po ga al iginḡ iginḡ yire yeḡ katminḡ. Irdeb darine wok irde kamenḡ goreb alya bereya kurunḡ gate mata bulunḡminḡ halde yunyeḡ yeḡ katminḡ,” yinyinḡ.

*Batimeus diwiliḡ titminḡ goyen nanḡkinyinḡ  
(Matiyu 20:29-34; Luk 18:35-43)*

<sup>46</sup> Be, Yesu go gwaha tenḡbe komatminḡya Yeriko taunde kwaminḡ. Kunḡ taun go tubul tenḡ kunḡ hikeyabe al kura diliḡ titminḡ goyen belenḡ sinḡare keperde al dawet kanḡanḡ yirde hinḡhin. Al gobe Batimeus, Timeus urminḡ. <sup>47</sup> Be, al gobe, “Nasaret ninḡ al Yesu waḡ hi,” yeke nurdeb hokde po, “Yesu, Dewit urminḡ, ne ga nenenḡ faranḡ nura be!” yirinḡ. <sup>48</sup> Irkeb al budam belenḡ inenḡ tenḡ, “Bada hawa!” inaminḡ. Gega goyabe ug po hoy yirinḡ. “Dewit urminḡ, ne ga nenenḡ faranḡ nura be!” yirinḡ. <sup>49</sup> Irkeb Yesu kunḡ hinḡhin goyen mereminḡ go nurdeb tek yeḡ huwaryinḡ. Huwardeb, “Al go inke wayi,” yinyinḡ. Irkeb al diliḡ titminḡ goyen, “Ge ninḡ yeḡ hi geb, amanḡ heḡ huwara!” inaminḡ. <sup>50</sup> Irkeb amanḡ heḡbe meḡe diba ulinḡhorminḡ hende ninḡ goyen tuguya tenḡ temeyde kururu unenḡ Yesu hitte kurinḡ. <sup>51</sup> Kukeb Yesu belenḡ, “Daha niri yeḡ hoy nirde ha?” inyinḡ. Irkeb al diwiliḡ titminḡ goreb, “Tisa, nanḡkenmewonḡ wor po yeḡ nurde hime,” inyinḡ. <sup>52</sup> Gwaha inkeb Yesu belenḡ, “Dufayge ne ninḡ tareḡ irha goke sope girhem geb kwa!” inkeb goyare goyen po diliḡ nanḡkenenḡbe Yesu kunḡ hinḡhin belenḡ go po gama iryinḡ.

# 11

## *Yesu Al Kurunjen ya balem bana hurkurin*

<sup>1</sup> Be, Yesuya komatminj yagoya gobe Yerusalem binde binde haminj. Irdeb Betfage taundeya Betani taundeya gor kwaminj. Taun irawa gobe Olip dugu dabayinde gor haryen. Be, Yesu belenj taun kura hinhide gor matbe komatminj irawa kura hulayan yirdeb gaha yinyinj: <sup>2</sup> “Taun iroyenter iro kuri. Kunbe donki fonenj kura al go hende ma kunj hitinj goyen fenje hike kiniryen. Kenenbe hol irde tenj wayiryen. <sup>3</sup> Al kura belenj, ‘Gob daha tenj har?’ dinkeb, ‘Doyan Al Kurunj belenj gake yihi. Ningeb henj ga monj tumulganj tiyyen,’ iniryen,” yinyinj.

<sup>4</sup> Ningeb kunjbe Yesu belenj yinyinj gwahade po donki goyen ya sinakde fenj titinj kenaryum. <sup>5</sup> Irde kunj hol irde hikeb al gor hinhan goreb, “Daha irye yenj donki go hol irde har?” yinaminj. <sup>6</sup> Irkeb Yesu belenj yinyinj gwahade po wol hekeb yubul tike tenj kwaryum.

<sup>7</sup> Be, donki go Yesu hitte tawanjbe ulinjhorminj yugu tenj donki go hende ugamkeb go hende hurkunj keperde kurinj. <sup>8</sup> Kunj hikeb al budam Yesu go palap irninj yenj ulinjhorminj yugu tenj belenyanj ugaminj. Irkeb al kurabe Yesu turunj irninj yenj belenj umna ird ird ninj patila yuwalnenj walde yawayaminj goyen belenyanj sar irde tukaminj. <sup>9</sup> Al kurab mehenj hekeb kurab kame henjbe tumnanj ala denjem isanj henj gaha yaminj:

“Hosanna!”\*

---

\* **11:9:** Hosanna gote minjbe ‘Al Kurunj, ge po turunj girde hitek!’

Doyan Al Kurunyen denemde wan hi al gobe Al Kurun belen guram irde tareñ iryen!

<sup>10</sup> Asininiñ Dewit belen alya bereyamiñ doyan yirde hinhin gwahade yara yen belen doyan diryen gobe Al Kurun belen guram irde sanin iryen.

Hosanna! Al Kurun, tareñge kurun wor po!” yamiñ.

<sup>11</sup> Be, Yesu go Yerusalem forok yenbe Al Kurunyen ya balem bana hurkuriñ. Irdeb dawet kurun bana goyen yeneñ tukuriñ. Gega nanja hubu hiriñ geb, komatmiñ 12ya Betani kwamiñ.

*Yesu Al Kurunyen ya balem bana hurkun ya haran hiriñ*

*(Matiyu 21:18-19)*

<sup>12</sup> Be, fay urkeb Betani tubul ten henyabe Yesu go binje iryiñ. <sup>13</sup> Irkeb fik he yuwalñen digula urtiñ goyen keneñbe igineñ miñyan daw yen kun kinyiñ. Kun miñde mat nan kinyiñ gega, igineñ miñmon, yuwalñen belen po aw urtiñ kinyiñ. Fik ferd ferd nalu mon geb, igineñ miñmon kinyiñ. <sup>14</sup> Gwahade keneñbe Yesu belen he goyen, “Al kura igineñge sopte ma niyyen,” inen karan uryiñ. Irkeb mere tiyyiñ goyen komatmiñ yago belen nuramiñ.

<sup>15</sup> Be, kun Yerusalem forok yenbe Yesube Al Kurunyen ya balem koya belen po milgu irtiñ bana gon hurkun al buda kurun gor det damu ten hinhan goyen kwep kwep yirde yakira tiyyiñ.

Irde hora kapyan heñ heñ marte† gasuñ yad yaboloñ teñ nu damu teñ hinhan marte keperd keperd gasuñ manañ yad yaboloñ teñ yuniñ. <sup>16</sup> Irdeb, “Damu teñ teñde niñ dawet ya balem diliñyan goyañ gore sopte yukyawan ma yir-nayin,” yiniñ. <sup>17</sup> Irdeb saba yirde heñyabe, “Al Kurunyen asañdebe, ‘Nere yabe megen niñ al buda kurun gayen gare wañ gabu irde mere nird nird ya hiyyen,’ yitiñ goyen ma nurde hanjen? Gega deñbe ya gayen teñ kawe marte bana kuñ kuñ gasuñ irde hañ,” yiniñ. <sup>18</sup> Gwaha yinkeb al buda kurun gor gabu iramiñ mar gore meremiñ go nurde dinon kok yamiñ. Niñgeb goke Al Kurun dolon ird ird mata doyañ marte karkuwanmiñya pris buda gote karkuwanmiñya Moseyen saba maryabe kafura heñbe, “Daha mat kura mayteke kamyen?” yen beleñ niñ nankenen hinhan. <sup>19</sup> Be, wawuñ hekeb Yesuya komatmiñya gobe taun kurun go tubul teñ mulgañ heñbe hinhande gor kwamiñ.

*Fik he torok yirin*  
(*Matiyu 21:20-22*)

<sup>20</sup> Be, wampot Yerusalem mulgañ heñ kuñ heñyabe fik he goyen filginiñde mat po torok yitiñ kenamiñ. <sup>21</sup> Keneñbe Pita gobe biñ bak yekeb, “Tisa, fik he karan urañ gob torok yiyuñ iro kena,” inyiñ. <sup>22</sup> Gwaha inkeb Yesu beleñ wol heñbe, “Dufaytiñbe Al Kurun niñ po taren

---

† **11:15:** Hora kapyan heñ heñ marbe Roma gabmanyen horaya Yuda marte horaya goyen al beleñ yen yunke Al Kurunyen ya balemde niñ hora teñ wolmiñen al go yunke gab Al Kurun galak yirde hanjen.

irnayin. <sup>23</sup> Fudinde wor po dinen hime. Al kura dugu gayen, ‘Kun makan alare kata!’ inen binde dufay budam ma iryen. Irdeb dufayminde, ‘Mere tihim gabe forok yen nunyen,’ yen nuryen gobe gwahade po forok yen unyen. <sup>24</sup> Gwahade ningeb gago dinhem. Det kuran Al Kurun gusunan irnayin gob dufaytindebe tihit wor po yen nurnayin. Irkeb dende hiyyen. <sup>25-26</sup> Ningeb Al Kurun mere irde henya kadtin belen bulun dirtin goyen bitin bak yekeb goyare po halde yunen hinayin. Irke gab Adotin sanjinmin kurun wor po goreb dende wor halde dunyen,” yinyin. †

*Yesu tarehmin ge gusunan iramin  
(Matiyu 21:23-27; Luk 20:1-8)*

<sup>27</sup> Be, Yesuya komatminya goyen sopte kun Yerusalem forok yamin. Irdeb Yesu go Al Kurunyen ya balem goyen koya milgu irtin bana hurkun kun wan ten hikeb pris buda gote karkuwanminya Moseyen saba marya Yuda marte doyan mar parguwakya belen yen hitte wayamin. <sup>28</sup> Irdeb Yesu gusunan irdeb, “Mata ten ha gayenbe ganunyen denemde ten ha? Ganun belen gwaha ten hayin ginkeb gago ten ha?” inamin. <sup>29</sup> Irkeb Yesu belen wol henbe, “Ne wor gusunan unjkuren kura diren tihim goyen wol hena ko. Irke gab al goyen denemde mata ten hime yen momon diren. <sup>30</sup> Yon Baptais belen al baptais yirde hinhin goyenbe Al Kurunyen

---

† **11:25-26:** Asan hoyandebe gahade hi: 26 den belen kadtin bulun dirtin goyen ma halde yunen bitin bana po yerde hinayinbe Adotin tarehmin kurun wor po goreb mata buluntin goyen ma halde dunyen.

denjemde ma alyen denjemde? Momon nirnanj!” yinyinj. <sup>31</sup> Irkeb mel go yingenj ulinj mere sege irdeb, “Al Kurunyen denjemde intek gob, ‘Munanj daninj geb sabaminj goyen usi yenj nurde gama ma irde hinhan?’ dinyenj,” yaminj. <sup>32</sup> Munanj alyen denjemde yetek gobe al buda kurunj gob Yon Bap-taisbe Al Kurunyen mere basanj al fudinde wor po yenj nurde hinhan geb, goke kafura haminj. <sup>33</sup> Ningeb mel goreb, “Nenbe go ma nurde hite,” inaminj. Irkeb Yesu belenj, “Ne wor mata tenj hime gayen al gote denjemde tenj hime ma dinenj,” yinyinj.

## 12

*Yuda mar belenj Yesu mayke kamyenj gote maya mere*

*(Matiyu 21:33-46; Luk 20:9-19)*

<sup>1</sup> Be, gwaha tenjbe Yesu belenj Al Kurunj dolonj ird ird mata doyanj marte karkuwanjinjya Moseyen saba marya Yuda marte doyanj mar parguwakya goyen maya mere mat gaha yinyinj: “Al kura wain metenj harde koya kerde milgu iryinj. Irdeb wain fiminj gilyanj hej hej ninj mete talde det gitik iryinj. Irdeb wain metenj go doyanj ird ird ya yok mananj iryinj. Irdeb metenj gobe metenj mar hoyanj haninde kerdeb nanja gisaw kurinj. <sup>2</sup> Be, wain finj heke yad yad nalureb metenj minj al gore alminj kura hulyanj irke metenj doyanj irde hinhan mar hitte wayyinj. Wanbe, ‘Wain kura nunke yad kwe,’ yinyinj. <sup>3</sup> Gega mel goreb al goyen mayde mayde takira tike dulinj kurinj. <sup>4</sup> Gwaha irkeb metenj alminj hoyanj wor tenj kerke wayyinj.

Irkeb al gobe tonanđe mayde nanyan irde bulun bulun irde takira tiyamin. <sup>5</sup> Be, sopte po al hoyan hulyan iryin. Gega al gobe mayke kamyin. Irkeb meten min al belen sopte al yad yerke wan hinhan po goyenbe kurabe gasa yirde yakira ten hinhan. Munan kurabe gasa yirke kamde hinhan. Meten marmin tumnan bulun bulun yirde hinhan. <sup>6</sup> Be, go po tike kun kun funanbe, 'Urne gab palap irnayin,' yenbe urmin bubulkunne wor po yen nurde unen hiyen al goyen ten kerke wayyin. <sup>7</sup> Gega wain meten doyan irde hinhan mar gobe kadam momon gird tenbe, 'Meten gate min alyen urminbe gago ningeb, wake mayteke kami. Gogab meten gate min al minmon hekeb nen belen po tetek,' yamin. <sup>8</sup> Irdeb meten min al gote urmin goyen mayke kamkeb tukun meten sinjare gor temeyamin.

<sup>9</sup> "Gwaha tikeb meten gote min al belen wanbe daha yiryen yen nurde han? Gobe wan gasa yirke kamnayin. Irdeb meten go ten al hoyan haninde kiryen. <sup>10</sup> Mere ga dinhem gate min goke Al Kurunyen asande katin goyen kapyan ma hen hanjen? Mere gobe gahade:

'Ya yird yird mar belen igin mon yen nurde pel iramin hora goyen al hoyan belen ten go hende ya sanin wor po iryin.

<sup>11</sup> Go iryin gobe Doyan Al Kurun belen iryin.

Dilninindebe kenenmin kusamon wor po,' yitin hi," yinyin. *Tikin 118:22-23*

<sup>12</sup> Gwaha yinkeb mel goreb, "Siraw mere gabe nen ga po dinen hi," yen nuramin geb, goke igin ma nurdeb daha mat kura ten fere tinin yen belen



niŋ nanŋkenamiŋ. Gega mel gobe al buda kurun goke kafura heŋbe tubul teŋ kwamiŋ.

*Yesu tunŋaŋ urniŋ yeŋ teks yad yad mata niŋ gusuŋaŋ iramiŋ  
(Matiyu 22:15-22; Luk 20:20-26)*

<sup>13</sup> Be, go kamereb Al Kurun dolon ird ird mata doyaŋ marte karkuwaŋmiŋya Moseyen saba marya Yuda marte doyaŋ mar parguwakya goreb Yesu goyen meremde kura soŋ heke tenayiŋ yeŋbe Herotyen alyabe Farisi mar kuraya hulyaŋ yirke Yesu hitte kwamiŋ. <sup>14</sup> Kuŋbe, “Tisa, gebe mere fudinde po teŋ hayen. Irde al kura al deŋem yaŋ ma deŋem moŋ goke ma nurde hayen geb, al niŋ kafura ma heŋ hayen. Irdeb fudinde mat po Al Kurunyen mere tagalde hayen. Niŋgeb gusuŋaŋ kura girtek. Moseyen saba gama irde hite mar gare Roma gabmanyen doyaŋ al kurun Sisar niŋ teks kertek gobe igiŋ ma dahade? Untek ma, goŋmiŋ?” inamiŋ. <sup>15</sup> Gega Yesu go usi matamiŋ goyen yeneŋ bebak teŋbe, “Daniŋ lomlom nirde haŋ? Hora kura tawaŋ nunke kene,” yinyiŋ. <sup>16</sup> Gwaha yinkeb hora mulowom unŋkureŋ tawayamiŋ. Tawakeb, “Gabe ganuŋde tonenya deŋemya har?” yineŋ gusuŋaŋ yiryiŋ. Irkeb wol heŋbe, “Roma gabmanyen doyaŋ al kurun Sisaryen,” inamiŋ. <sup>17</sup> Irkeb Yesu belen, “Dawet kura Roma gabmanyen keneŋbe Roma gabman po unen hinayiŋ. Gwahade goyen po, Al Kurunyenbe Al Kurun po unen hinayiŋ,” yinyiŋ. Irkeb mere go nurdeb dinon kok yamiŋ.

*Sadusi mar belej al kamtiŋ huward huward niŋ  
Yesu gusuŋaŋ iramiŋ  
(Matiyu 22:23-33; Luk 20:27-40)*

<sup>18</sup> Be, go kamereb Sadusi mar belej Yesu hitte wayamiŋ. Go mar gobe al kamtiŋbe epte ma huwarnayiŋ yeŋ haŋyen. Be, mel goreb, <sup>19</sup> “Tisa, Mose belej asaŋde gahade kayyiŋ: ‘Al kura diriŋ miŋmoŋ heŋya berem tubul ten kamkeb kuliŋ kura hiyeŋ goreb itiŋde beretap goyen tenbe itiŋ ge diriŋ forok irde unyeŋ,’ yitiŋ hi. <sup>20</sup> Be, kamay itiŋya mel 7 kura hinhan. Itiŋ kurunbe berem yaŋ gega, diriŋ miŋmoŋ heŋya kamiŋ. <sup>21</sup> Irkeb kuliŋ belej beretap go tiriŋ. Gega yeŋ wor diriŋ miŋmoŋ heŋya kamiŋ. Yende kuliŋ wor gwahade po kamiŋ. <sup>22</sup> Be, gwahade po kuŋ kuŋ kuliŋ funaŋ ge wor beretap go tiriŋ goyen diriŋ kura forok ma irdeya kamiŋ. Funanbe bere goyen wor kamiŋ. <sup>23</sup> Be, ire itiŋya mel gote berembe unkuŋeŋ gogo po hinhin geb, kame al kamtiŋ huward huward nalurebe bere gobe ganunde berem hiyyeŋ?” inamiŋ.

<sup>24</sup> Gwaha inkeb Yesu belej wol heŋbe, “Deŋbe Al Kurunyen tareŋya merem asaŋde katiŋya goyen keneŋ wuk ma yeŋ haŋyen. Gwahade geb soŋ heŋ haŋ goyen go ma keneŋ haŋ? <sup>25</sup> Al kamtiŋ huwarnayiŋ nalurebe al belej bere yade bere belej al kuŋ kuŋ mata go miŋmoŋ hiyyeŋ. Yeŋbe Al Kurunyen gasunde hurkunbe yende miyoŋ yara henayiŋ. <sup>26</sup> Al kamtiŋ huward huward matabe Moseyen asaŋde kapyan ma heŋ haŋyen? Al Kurun belej he gergeŋ melak heŋ hinhin bana gore mat Mose mere irde, ‘Nebe Abra-

ham, Aisakya Yekopyat Al Kurun, ' inyiñ gobe ma kapyan heñ hanjen? Mel gobe kamamiñ gega, tonenbe yenya han geb, gogo gwahade yirin. <sup>27</sup> Niñgeb Al Kurunbe al kamtiñde Al Kurun moñ, diliñ gergen han mar gote Al Kurun. Den gab son wor po heñ han, ” yinyiñ.

*Moseyen saba gote miñ wor pobe da?*

*(Matiyu 22:34-40; 23:1-36; Luk 10:25-28)*

<sup>28</sup> Be, goyenterbe Moseyen saba al kura gor henbe mel gore bulun mat Yesu gusunañ iramiñ goyen Yesu beñ wol heñ yunen hike palña irde hinhin. Irdeb Yesu beñ meremiñ kenkela po wol heñ yunen hike nurdeb yeñ wor, “Saba budam kurun nurde hite gote miñ wor pobe damiñ?” iney gusunañ iryiñ. <sup>29</sup> Irkeb Yesu beñ wol henbe, “Saba miñ wor pobe gahade. Den Israel mar nurnañ ko. Doyañ Al Kurunniñbe Al Kurun yeñ unken po hi. <sup>30</sup> Niñgeb bubulkunñde mat, bitinñde mat, irde dufaytiñde mat wor po Al Kurun niñ amañen nurde uney hinayiñ. Tarenñiñ manañ tumñañ gabu irde yeñ ge amañen nurd uney hinayiñ. <sup>31</sup> Saba gote kurhanbe al kadtiñ goyen dindigen ge amañen nurde hanjen gwahade goyen po nurde yunen hinayiñ. Saba hoyañ kura iraw gayen fole yirñ ma han, ” inyiñ. <sup>32</sup> Gwaha inke al goreb, “Tisa, Al Kurunbe yeñ unken gog po, hoyañ miñmoñ yaha gobe fudinde wor po yaha. <sup>33</sup> Bubulkunñde mat, bitinñde mat, irde dufaytiñde mat wor po Al Kurun niñ amañen nurde uney hinayiñ. Tarenñiñ manañ tumñañ gabu irde yeñ ge amañen nurd uney hinayiñ,

irde dindiken ge amanen nurde hanjen gwahade goyen po kadtin ge bubulkunтинde mat amanen nurd yunen hinayin gobe Al Kurun dilinde galak mataya dapna kunga ten kasor ird ird mataya goyen fole wor po yirde hi,” inyin. <sup>34</sup> Be, al gore Yesuyen mere goyen kenkela wol hekeb, “Gebe Al Kurunya awalik hetek binde wor po haha,” inyin. Gwaha inkeb gor hinhan mar belen gusunan ird ird nin kama hamin.

*Yesu belen Farisi marte sikken tagalyin  
(Matiyu 22:41-46; Luk 20:41-47)*

<sup>35</sup> Be, Yesube Al Kurunyen ya balem koya belen po milgu irtin bana gon al saba yirde hinhin. Saba yirde henyabe gaha yinyin: “Dahade ningeb Moseyen saba mar belenbe Mesaiabe Dewityen fonen yen hanjen? <sup>36</sup> Dewit yingenbe Holi Spirit belen ketal urke mere tiyyinbe gahade:

‘Al Kurun belenbe Doyan Al Kurunne gaha inyin: “Wan ketalner hen al denem yan wor po hawayin. Irkeb asogo girde han mar goyen bul yirde yawamekeb gasa yirde yufurka tiyayin,” inyin,’ yitin hi. *Tikin 110:1*

<sup>37</sup> Dewit yirin gwahade po Mesaia goyen Doyan Alne inyin. Gega dahade ningeb, Moseyen saba mar belen bul mat Mesaia gobe Dewityen fonen yen hanjen? Gobe kukuwamnen wor po,” yinyin. Irkeb al buda kurun gore mere go nurdeb amanen nuramin.

<sup>38</sup> Be, saba yirde henyabe gaha yinyin: “Moseyen saba mar ninbe kenkela po hen ga hinayin. Yenbe al belen denen palap dirnan yenbe ulinhormin sombornen yerde al dilinyan wilwul

teŋ hanŋen. <sup>39</sup> Irdeb Yuda marte gabu ya bana dula nalu karkuwanyaŋ kuŋ heŋbe al denŋem yaŋde gasunyaŋ po keperde hanŋen. <sup>40</sup> Irdeb beretapyen samuŋ komkom heŋ hanŋen. Gega al beŋeŋ turuŋ dirnaŋ yeŋ Al Kuruŋ mere irhet yeŋbe mere ulyaŋ wor po tuluŋ teŋ hanŋen. Al gwaha teŋ hinayiŋ mar gobe gote muruŋgem buluŋ kuruŋ wor po tenayiŋ,” yinyiŋ.

*Beretap beŋeŋ Al Kuruŋ galak iryiŋ gote mere  
(Luk 21:1-4)*

<sup>41</sup> Irdeb Yesube Al Kurunyaŋ ya balem bana goŋ Al Kuruŋ niŋ hora yerd yerd gasuŋ goyen siŋa kurhan keperdeb alya bereya hora yawaŋ yerde hike yeneŋ hinhin. Yeneŋ hikeya al samuŋ miŋyaŋ mar budam hora karkuwaŋ yawaŋ yerde hinhan. <sup>42</sup> Gega beretap kura waŋbe hora mulowom irawa yiryiŋ. <sup>43</sup> Irkeb Yesu beŋeŋ komatmiŋ yago tumŋaŋ hoy yirdeb, “Fudinde wor po diŋeŋ hime. Beretap bunineŋ garebe al budam gor hora yerhaŋ mar goyen fole yirde hora kuruŋ po kera. <sup>44</sup> Samuŋ miŋyaŋ marbe samuŋmiŋ yufut yuneŋ hora yerhaŋ. Munan bere gabe siksukneŋ niŋgeb, horamiŋ basiŋa irtek yara gega tumŋaŋ yawaŋ yera,” yinyiŋ.

## 13

*Nalu funaŋde niŋ mata  
(Matiyu 24:1-35; Luk 21:5-33)*

<sup>1</sup> Be, Yesu go Al Kurunyaŋ ya balem goyen tubul teŋ kuŋ heŋya komatmiŋ unkuŋeŋ kura beŋeŋ, “Tisa, hora karkuwaŋ ga yena. Ya gabe tanarde tubul wor po titiŋ,” inyiŋ. <sup>2</sup> Irkeb Yesu beŋeŋ

wol henbe, “Ya kurun hora belen irtin kenen han gayen kamebe hora unjukan mun kura kadom hende ma hiyen. Tumnan gilgalan irde katen pasi henayin,” inyin.

<sup>3</sup> Be, Yesu go hurkun Olip dondonde keperde ya balem goyen kenen hikeyabe Pita, Yems, Yonya Andruya po wanbe, <sup>4</sup> “Daha nanabe mere dirha go forok yenayin? Irde da mata kenenbe go dinha goyen bebak titek?” inen gusunan iramin. <sup>5</sup> Irkeb Yesu belen wol henbe, “Kenkela hen ga hinan ko. Monjo al usi dirnayin geb. <sup>6</sup> Al budam nere mere ten wayhet yen, ‘Nebe Mesaia,’ dinen usi dirnayin. <sup>7</sup> Goyenterbe fulena forok yen hinayin. Goyenbe fulena forok yen yen mere momon nurde goke hurkunkat ma ten hinayin. Fulena mata gobe forok yen hinayin gega, nalu funanbe kame wor po ga wayyen. <sup>8</sup> Fudinde, al min kura belen huwarde al min hoyan kuraya arde hinayin. Gabman kura belen gabman hoyanya fulena ten hinayin. Niniya karkuwan nana kurar kurar forok yen hinayin. Binje kamde kamde nalu forok yen hinayin. Kanduk kurun gobe bere belen han karya dirin kawan kere yen ulin misin katyen go gwahade goyen po, kanduk go wa forok yeke gab nalu funan forok yiyyen.

<sup>9</sup> “Nin geb kenkela po hen ga hinayin. Ne nin tenbe asogotin belen Yuda marte gabu yayan dukukeb doyan mar belen dusulak ten hinayin. Irdeb merem yan dird dird nin tiyunde nin doyan marya gabman doyan mar karkuwanya dilingde dukukeb gor huwarde ne nin momon yirnayin. <sup>10</sup> Mere igin ne nin yitin gobe megen kurun gayen

tagalde tukuke nurde pasi heke gab nalu funan forok yiyyen. <sup>11</sup> Niñgeb al kura dukun merere derke goya daha yewen yen goke kanduknen ma nurde hinayin. Mere ten ten albe Holi Spirit, den mon. Niñgeb yen beley mere dunkeb go po yen hinayin.

<sup>12</sup> “Goyenter mata kurabe ire itinya yingen ulin kadam al hay hen gunen tike al beley wan gasa yirke kamnayin. Nanin beley dirinmin wor gwahade po yiryen. Dirin manan nanin miliñ kaknar yirde al hoyan yinke wan gasa yirke kamnayin. <sup>13</sup> Ne nin nurkeb al budam beley haram dirnayin. Gega al kura tareñ hen kanduk go fole yiryenbe Al Kurun beley tumulgan tiyyen.

<sup>14</sup> “(Ge, asan gayen ga kapyan hen ha albe kenkela bebak tiyayin.) Al Kurunen ya balemde mata kukuwam kura gor forok yetek mon gega, forok yeke kenenbe den Yudia nanare hinayin marbe busaharde dugure hurkun bana kunayin. <sup>15</sup> Goyenterbe al kura ya hende hiyen goyen katen yamin bana hurkun detne kura yade ga busahare ma yiyyen. <sup>16</sup> Al kura metenmin tubul ten yare kun amilne ten ga ma yiyyen. <sup>17</sup> Goyen nalurebe bere bin minyanya bere dirin besare nin minyanyabe metenen wor po yiryen. <sup>18</sup> Niñgeb goke Al Kurun gusunan irde hinayin. Mongo kanduk kurun goyen nalu bulunde forok yiyyenkek geb. <sup>19</sup> Goyen nalureb megen gabe kanduk kurun wor po tiyyen. Hanƙapya Al Kurun beley megen iryin wan wan ga hitere irde kame wor kanduk gwahade kura ma kentek. Go kanduk gobe baran wor po duryen. <sup>20</sup> Niñgeb Al

Kuruṅ beleş nalu buluṅ goyen ulyaṅde po tubul tike manhan al tumṅaṅ kamwoṅ. Gega al nere yiriṅ goke teṅbe nalu goyen wer irdeb dolfon iryiṅ. <sup>21</sup> Goyen nalure al kura beleş Mesaia niṅ yeṅ iṅgog gag dirkeb goyen nurde gama ma yirnayiṅ. <sup>22</sup> Mesaia falkukya Al Kuruṅyen mere basañ mar falkukya beleş waṅbe alya bereya Al Kuruṅ beleş basaṅa yirtiṅ goyen daha mat kura usi yirteke katnaṅ yeṅ mata tiṅeṅ turṅuṅ yaṅ kurayen kurayen forok yirnayiṅ. <sup>23</sup> Niṅgeb keṅkela heṅ ga hinayiṅ. Merebe nalu go forok ma yeṅ hikeya pet teṅ gago momoṅ dirde hime geb.

<sup>24</sup> “Niṅgeb kanduk kuruṅ goyen kamereb, ‘Naṅa kidoma hiyyeṅ, irdeb gagasi ma timiyyeṅ.

<sup>25</sup> Naṅkiṅde mat dinambe suk yeṅ katnayiṅ.

Irdeb naṅkiṅde niṅ dawet kuruṅ goyen aṅgor iryeṅ.’ *Aisaia 13:10; 34:4*

<sup>26</sup> Irde go nalureb al tumṅaṅ ne Al Urmiṅ gayen saṅiṅne turṅuṅ yaṅ wor po kigariṅkiṅ faykek hende katmeke nennayiṅ. <sup>27</sup> Irdeb miyoṅne yad yermeke kuṅ megeṅ muruṅ kurhan mat kuṅ megeṅ muruṅ kurhan niṅ alya bereya nigeṅ ge basaṅa yirtiṅ goyen yawaṅ gabu yirde nunnayiṅ.

<sup>28</sup> “Niṅgeb fik he ga keneṅ gor mat dufay tenaṅ. He haniṅ goyen beda urde yuwalṅeṅ gergeṅ forok yekeb beda naṅa heweṅ tiya yeṅ nurde hanṅen. <sup>29</sup> Niṅgeb gwahade goyen po, kame mata gayen forok yeke yeneṅbe nalu funaṅbe binde wor po hihi yeṅ nurnayiṅ. <sup>30</sup> Fudinde wor po dineṅ hime. Alya bereya gayen nalure haṅ gayen ma kamkeya mata kuruṅ gayen forok yiyyeṅ,”



yinyiŋ. <sup>31</sup> Megenya nanŋkiŋyabe hubu hiriryen. Gega merenebe hubu ma hiyyen.

*Nalu funaŋbe bebakken mon*  
(*Matiyu 24:36-44*)

<sup>32</sup> Be, Yesu go sopte gaha yinyiŋ: “Al kura nalu goyen bebakken ma nurde hi. Hubu wor po. Naniŋ po ga nurde hi. Urmiŋya miyoŋmiŋ yiŋgenya haŋ goyen wor ma nurde haŋ. <sup>33</sup> Nalu goyenter dawet go wayyen yen ma nurde haŋ niŋgeb, kenkela heŋ doyaŋ heŋ hinayiŋ. <sup>34</sup> Gobe ya miŋ al kura naŋa gisaw kwe yen meten marmiŋ haniŋde meten kurayen kurayen yunenbe ya doyaŋ al goyen, ‘Ne waŋ waŋ nalu niŋ dufay heŋ kenkela doyaŋ heŋ hayiŋ,’ inen kuyen go gwahade goyen. <sup>35</sup> Niŋgeb ya gote miŋ al mulgaŋ heŋ heŋ nalu ma nurde haŋ geb, kenkela heŋ ga hinayiŋ. Wawuŋbana daw, wawuŋ binde daw tatirok mere ma tiyyenya daw ma biram kerkeya yara kura wayyen gobe ma nurde haŋ. <sup>36</sup> Moŋgo ferde ug heŋ hikeya waŋ bemel diryen geb. <sup>37</sup> Mere ga diniŋ hime gabe deŋ po ma diniŋ hime. Al tumŋaŋ yinen hime. Niŋgeb kenkela heŋ ga hinayiŋ,” yinyiŋ.

## 14

*Yesu mayde mayde niŋ sege irde hinhan*  
(*Matiyu 26:1-5; Luk 22:1-2; Yon 11:45-53*)

<sup>1</sup> Be, Yuda marte asem yago belen Isip naŋa tubul tiyamiŋ goke biŋ bak yen yen ge gabu

ird ird nalu kurunj Pasoba\* inenj hanyen goya beret yis minjon nen nen nalu kurunj goya goyen molye go yenj henya pris buda gote karkuwanminya Moseyen saba marya belej daha mat kura al dilinj banare Yesu tenj mayteke kami yenj balminj mere sege iraminj. <sup>2</sup> Gega yingenj mere mayde, “Dula nalu kurunj gayenter ma gwaha titek. Monjo al belej fulenja dirnak ge,” yaminj.

*Bere kura nat fiminj tenj Yesu tonande wok iryinj (Matiyu 26:6-13; Yon 12:1-8)*

<sup>3</sup> Be, Yesu go Betani taunde Saimonyen yare henj binje nene hinhin. Saimon gobe bikken busuka minyanj hiyen goke tenje Saimon Busuka inenj hanyen. Binje nene hikeyabe bere kura belej nat he filgininj gote fiminj haminj iginj munj wor po yalinj alabasta hora po irtinj bana hitinj goyen tawanj migisunj mardeb Yesu tonande wok iryinj. Nat fiminj gobe damum hende wor po. <sup>4</sup> Be, bere gore gwaha tikeb al gor hinhan gore go kenenj binj ar yekeb, “Daninj dawet iginj munj gayen titminenj bulunj ira?” yenj yingenj ulinj tagalde hinhan. <sup>5</sup> Tagalde henyabe, “Det goyen damumbe al kura dama unjurenje metenj tenj hora tiyyenj gote folek. Ningeb hora go tenje al buninjenj

---

\* **14:1:** Bikkenj Israel mar Isip nanja tubul tenj Kenan kuninj tiyaminjyabe Al Kurunj belej sipsip al dirinj dirnenj gasa yirde darim yade yame kantayanj sam yirnayinj yinyinj. Munanj al kura gwaha ma tiyaminj marbe Al Kurunjen miyonj belej wanje mel gote urminj matalinja dapnaminj matalinja goyen tumnanj gasa yirke kamaminj. Gega mereminj gama iraminj marbe miyonminj belej yubul tiyaminj goke dufay henj henj ge dula mata tenj hinhan.

samuṅ miṅmoṅ faranṅ yurtek igiṅ gega, gwaha ma tiya,” yeṅ inenṅ teṅ buluṅ iramiṅ. <sup>6</sup> Irkeb Yesu beṅ, “Tubul tinaṅ. Daniṅ dufaymiṅ buluṅ irde haṅ? Yeṅbe mata igiṅ muṅ wor po nira. <sup>7</sup> Al bunineṅ samuṅ miṅmoṅbe hugineṅ denya hikeb igiṅ faranṅ yurde hinayiṅ. Goyenpoga nebe denya hugineṅ ma hitek. <sup>8</sup> Yeṅ beṅ mata nirtekbe gag po nira. Nat fimiṅ sam nira gabe ne kammeke mete nirnayiṅ goke teṅ gago gitik nira. <sup>9</sup> Niṅgeb fudinde wor po dineṅ hime. Ne niṅ naṅa kurunṅ gayen tagalde tukunṅ heṅbe bere gare mata tiya gake wor tagalde hike nurde hinayiṅ,” yinyiṅ.

<sup>10</sup> Irkeb Yesuyen komat kura deṅembe Yudas Iskariot gore pris buda gote karkuwanṅmiṅ haniṅde pel ire yeṅ kuriṅ. <sup>11</sup> Kunṅ yenkeb yende mere goyen nurde amanṅ heṅbe horare damu girtek inamiṅ. Irkeb Yudas go daha mat kura Yesu goyen mel gote haniṅde kereṅ yeṅ dufay heṅ hinhin.

*Yesuya komatmiṅya dula funanṅ tiyamiṅ*

*(Matiyu 26:17-25; Luk 22:7-14,21-23; Yon 13:21-30)*

<sup>12</sup> Be, haṅka wawunṅbe beret yis miṅmoṅ nen nen nalu miṅ ureṅ tiya yeṅ nurdeb Yesuyen komatmiṅ yago beṅ, “Damde kunṅ Pasoba nalure niṅ biṅge goyen gitik irniṅ?” yeṅ gusuṅanṅ iramiṅ. Go nalure goyenterbe Pasoba niṅ teṅ sipsip dirneṅ gasa yirde kunga teṅ hanṅen. <sup>13</sup> Irkeb Yesu beṅ komatmiṅ irawa kura hulayanṅ yirdeb, “Yerusalem kunṅbe al kura fe kuwe teṅ waṅ kuke keneṅbe gama iriryenṅ. <sup>14</sup> Ya binde hurkukeb gama irde hurkunṅ ya miṅ al goyen

kenenbe, ‘Tisa belen, “Gasun darebe neya komatneya Pasobayen binje netek?” yihi,’ iniryen. <sup>15</sup> Gwaha inkeb ya bana gon gasun kurun kura hende hi, bikken sope irtin goyen dikala diryen. Irkeb gasunde gorbe dula ten ten det goyen gitik iriryen,” yinyin. <sup>16</sup> Irkeb irem go Yerusalem kunbe yen yinyin gwahade po yenaryum. Irdeb Pasoba binje goyen gitik irdeb mulgan haryum.

<sup>17</sup> Be, wawunbana hekeb Yesuya komatmin 12ya goyen yare gor kun forok yamin. <sup>18</sup> Irdeb ya binde gon hurkun keperde dula ten hinhan. Dula ten henyabe Yesu belen, “Fudinde wor po dinhem. Al unkuren kura tumnan dula ten hite bana gare po asogoner haniinde niryen,” yinyin. <sup>19</sup> Irkeb komatmin wen gor hinhan gobe kanduknen nuramin. Irdeb yunkuren yunkuren wanbe, “Ne nin daw yen ha?” inen gusunan irde hinhan. <sup>20</sup> Irkeb Yesu belen wol henbe, “Gobe al neya tumnande beret ten fe koron unkuren bana fakamde hi al goreb gwaha tiyyen. <sup>21</sup> Ne Al Urmin gabe Al Kurunyen mere basan al belen bikken asande kayamin goyen po gama irdeb kamen. Goyenpoga ne Al Urmin gayen asogoner haniinde niryen al gobe kanduk kurun wor po tiyyen. Al gobe kawan ma hiri manhan kanduk bulun goyen go ma kenwon,” yinyin.

<sup>22</sup> Irdeb binje nene henyabe Yesu belen beret tenbe Nanin igin nurd unenbe ubala ten komatmin yunin. Yunenbe, “Beret dunhem gahade gayen po nebe den ge ten kamen. Ningeb goke tenbe beret gabe gasonne geb, ten nenan,” yinyin. <sup>23</sup> Irdeb wain fimin gisu bana hitin goyen tenbe

sopte po Al Kurun̄ igin̄ nurd unen̄be, “Ga nan̄,” yinen̄ yunkeb tum̄nan̄ nitin̄ ala tiyamin̄. <sup>24</sup> Irkeb Yesu belen̄, “Al megen han̄ kurun̄ gake Al Kurun̄ belen̄ bīna taren̄ tiyyin̄ goke ten̄ darine wok irde kamen̄. Nin̄geb wain nahan̄ gobe darine. <sup>25</sup> Fudinde dinen̄ hime. Wain fimin̄ gayen teban̄ ma newen̄. Kun̄ kun̄ Al Kurun̄ belen̄ alya bereyamin̄ doyan̄ yiryen̄ goyenter gab den̄ya tum̄nan̄ sopte wain fimin̄ gergen̄ netek,” yinyin̄.

<sup>26</sup> Be, go kamereb tikin̄ hamin̄. Irdeb Olip don̄don̄de hurkamin̄.

*Pita belen̄ helwan̄ hiyyen̄ goke tagalyin̄*

*(Matiyu 26:31-35; Luk 22:31-34; Yon 13:36-38)*

<sup>27</sup> Be, hurkun̄ gor hen̄be Yesu belen̄ gaha yinyin̄: “Den̄ tum̄nan̄ nubul ten̄ busaharnayin̄. Mata gote merembe hakot asan̄deb,

‘Sipsip doyan̄ al go maymekeb sipsipbe burgagaw kernayin̄,’ katin̄ hi. *Sekaraia 13:7*

<sup>28</sup> Gega kamen̄ goyen sopte huwardeb ne wa mehen̄ hen̄ Galili kwen̄,” yinyin̄. <sup>29</sup> Irkeb Pita belen̄, “Al hoyan̄ gabe gubul tinayin̄ gega, nebe epte ma wor po gwaha tiyen̄,” inyin̄. <sup>30</sup> Irkeb Yesu belen̄, “Fudinde wor po ginen̄ hime. Han̄ka wawun̄ tatirok irawa ma irkeya ge wa wawun̄ karwore ne nin̄ helwan̄ hen̄, ‘Al gobe ma nurd unen̄ hime,’ yawayin̄,” inyin̄. <sup>31</sup> Gega Pita belen̄, “Geya wor igin̄ kamyen̄. Go ma wor po gubul tiyen̄,” inen̄ taren̄ po hirin̄. Irkeb kadom yago manan̄ huwardeb tum̄nan̄ gwaha ala inamin̄.

*Yesu Getsemani hen̄ Al Kurun̄ mere iryin̄*

*(Matiyu 26:36-46; Luk 22:39-46)*

<sup>32</sup> Be, gor mat kuñ naña deñe kura Getsemani iney hanyende gor forok yenbe komatmiñ goyen, “Gar keperde doyañ nirde hike nebe Al Kurun mere ireñ,” yinyiñ. <sup>33</sup> Irdeb Pita, Yems, Yonya po yadab gasuñ hoyande kwamiñ. Goyareb Yesube dufaymiñya binjabe kanduk wor po hiriñ. <sup>34</sup> Irkeb mel karwo goyen yinyiñ. “Kanduk kurun wor po mununa. Irkeb kamtek wor po nurhem. Niñgeb gar heñ keñkela heñ hinañ ko,” yinyiñ. <sup>35</sup> Gwaha yinenbe gor mat muñ kura siñgir ten kuñbe megen katen dokolhon yuguluñ tenbe belen hoyañ kura hi kenem kanduk kurun yen hitte forok yetek nalu goyen forok ma yewoñ yen Al Kurun mere iryiñ. <sup>36</sup> “Ado, mata budam kurun gabe delgerbe meteneñ kuram moñ. Niñgeb belen hoyañ kura hi kenem kanduk gayen go ma teweñ. Goyenbe nere dufay ma gama irayiñ. Gigen dufay go po gama irayiñ,” inyiñ. <sup>37</sup> Irdeb mulgañ heñ kuñ komatmiñ karwo gobe firtiñde hike yinyiñ. Gwahade yenenbe Pita goyen, “Saimon, bikkeñ ferha gago? Epte ma keperde muñ kura doyañ hawayiñ?” <sup>38</sup> Arkup ma yo, irde Al Kurun mere irde ga hayiñ. Gogab Satan wañ lom girkeb go ma katayiñ. Begerbe wilakneñ nurde ha. Gega ulgebe kanduk heñ hi,” inyiñ.

<sup>39</sup> Irdeb sopte yubul ten kuñ hanjapya Al Kurun mere iryiñ gwahade po inyiñ. <sup>40</sup> Be, mulgañ heñ wañbe mel karwo goyen dukpu hika yirke sopte po firtiñde hike yinyiñ. Irkeb mel go huwardeb feramiñ goke warga heñbe Yesu goyen gwaha mat kura mere irtek ma nuramiñ.

<sup>41</sup> Gwahade yenenbe mulgaŋ heŋ Al Kurun mere irde hinhin gasuŋde kuniŋ. Irdeb funaŋ mel karwo go hitte waŋbe, “Huwarnan! Ep ferde usaŋ hahan niŋ. Ne Al Urmiŋ gayen mata buluŋ mar haniŋde nertek nalube gago forok yihi. <sup>42</sup> Huwarke kuniŋ. Asogoner haniŋde nertek albe gago bikkeŋ waya geb,” yinyiŋ.

*Waŋ Yesu tanaramiŋ*

*(Matiyu 26:47-56; Luk 22:47-53; Yon 18:3-12)*

<sup>43</sup> Gwaha yineŋ hikeyab Yesuyen komatmiŋ kura Yudasyabe Yesu teŋ teŋ marya goyen wayamiŋ. Fuleŋare niŋ bidilaya nukwaya yanarde wayamiŋ. Go mar gobe pris buda gote karkuwaŋmiŋya Moseyen saba marya irde Yuda marte doyaŋ mar parguwakya belen hulyaŋ yirkeb gogo wayamiŋ. <sup>44</sup> Be, Yesu asogom haniŋde kertek al goreb belen waŋ heŋya Yesu tetek mar goyen yinyiŋ. “Kuŋ forok yeŋbe mata kura tiyeŋ geb. Al kura amaŋ amaŋ irde uluŋde u irmeke nenenbe gog po yeŋ kuŋ tenayiŋ. Irdeb upsineŋ po tanarde teŋ kunayiŋ,” yinyiŋ. <sup>45</sup> Irdeb forok yeŋ goyare po Yesu hitte waŋbe, “Tisa,” inenbe yende pere ird ird matare uluŋde u iryiŋ. <sup>46</sup> Irkeb al buda gore waŋ tanaramiŋ. <sup>47</sup> Gwaha tikeb Yesu komatmiŋ kura yeŋ binde hinhin goreb fuleŋare niŋ bidilamiŋ mardeb pris buda gote kurunmiŋde meten al gote kirmiŋ sapa iryiŋ. <sup>48</sup> Irkeb Yesu belen yeŋ tetek mar goyen, “Ne gayen fuleŋa mar yad kuŋ hime geb, gago fuleŋare niŋ bidilaya nukwaya manan waŋ

nawarniñ teñ hañ? <sup>49</sup> Nebe denya hugiñeñ hinhet. Al Kurunyen ya balem bana saba tagalde hinhem. Gega go ma nade hinhan. Goyenbe goñminj. Al Kurunyen asañde mere katiñ hi gwahade po forok yiyyen,” yinyiñ. <sup>50</sup> Irkeb komatmiñ yago tumñañ Yesu tubul teñ busaharamiñ.

<sup>51-52</sup> Goyenterbe al foñeñ kura amil faykek po aw teñ Yesu gama irde hinhin. Goyenbe yeñ manañ mel gore tanarkeb amil goyen gor po afuyañ heñbe kupsoñ busaharyiñ.

*Yesube pris buda gote kurunmiñ diliñde huwaryiñ*

*(Matiyu 26:57-68; Luk 22:54-55,63-71; Yon 18:13-14,19-24)*

<sup>53</sup> Be, Yesube pris buda gote kurunmiñ Kaiafas hitte tukukeb pris buda gote karkuwanmiñya, Yuda marte doyañ mar parguwakyabe Moseyen saba marya tumñañ gabu iramiñ. <sup>54</sup> Be, Pitabe Yesu gama irde kuriñ gega, gisaw yarham po hinhin. Irdeb pris buda gote kurunmiñde ya kurun goyen milgu irtiñ koya bana goñ gabu gasuñde hurkuriñ. Irdeb gorbe ya goyen doyañ irde hinhan marya tumñañ kak kateñ hinhan.

<sup>55</sup> Irkeb pris buda gote karkuwanmiñya Yuda marte doyañ mar tumñañ goya gabu irde da misiñde kura Yesu mayteke kami yeñ mere sege iramiñ. Gega mere miñ igiñ kura ma kenamiñ.

<sup>56</sup> Gorbe al budam Yesu merem yañ irniñ yeñ usi mere fakaka iramiñ. Gega meremiñ kurun gobe soñ ala heke miñ keñkelak kura ma forok yiriñ. <sup>57</sup> Gwaha teñ kuñ kuñbe al kura belen huwardeb usi mere gahade tiyamiñ. <sup>58</sup> “Al gareb,



‘Al Kurunyen ya balem al haniṅde irtinṅ gabe upew ureṅ. Irdeb nanṅkahal karworeb hoyan ireṅ. Goyenbe al haniṅde irtinṅ gahade moṅ,’ yeke nurtirinṅ,” yaminṅ. <sup>59</sup> Gega merem goyen wor soṅ ala heṅ miṅ keṅkelak ma forok yirinṅ.

<sup>60</sup> Irkeb pris buda gote kurunṅmiṅ beṅeṅ gor gabu iramiṅ mar diliṅ mar huwardeb, “Mere ulger irde haṅ gayen kura muṅ wol ma hawayinṅ? Dahade nurde ha?” inenṅ Yesu gusuṅaṅ iryinṅ. <sup>61</sup> Gega Yesu gobe haywanṅ ma irde balminṅ po hin-hin. Irkeb sopte po gusuṅaṅ irdeb, “Ge gayenbe Mesaia, Al Kurunṅ neṅ beṅeṅ doloṅ irde hityen gote Urminṅ?” inyinṅ. <sup>62</sup> Irkeb Yesu beṅeṅ wol heṅbe, “Gwaha, nebe ge yaha gog po. Niṅgeb ne Al Urminṅ gayenbe al deṅem yaṅ wor po heṅ Al Kurunṅ saṅinṅmiṅ kurunṅ wor po gote haniṅ yase beṅeṅ keperdeb kigariṅkinṅ faykek hende kateṅ himeke nennayinṅ,” inyinṅ. <sup>63</sup> Gwaha inkeb pris buda gote kurunṅmiṅ goreb Al Kurunṅ sukal ira yeṅ biṅ ar yeke ulinṅhorminṅ erek irdeb, “Yinṅeṅ gwaha yihi geb, daniṅ merem yaṅ irtek al hoyan niṅ nurtek?” yirinṅ. Irdeb al buda goyen, <sup>64</sup> “Al Kurunṅ sukal ira gab dahade nurde haṅ?” yinenṅ gusuṅaṅ yiryinṅ. Irkeb mel goreb biṅde bulunṅ nurde Yesu goyen kamyenṅ wor po yaminṅ. <sup>65</sup> Irkeb kura beṅeṅ meyanṅ irde amil teṅ diliṅ mala teṅ haniṅ buda irde mayde henjab, “Tagala. Ganunṅ beṅeṅ muguna?” inaminṅ. Irdeb pris buda gote kurunṅmiṅde ya goyen doyanṅ irde hanṅyen mar beṅeṅ tukunṅbe usulak tiyaminṅ.

*Pita beley Yesu niŋ helwan hirin  
(Matiyu 26:69-75; Luk 22:56-62; Yon 18:15-18,25-27)*

<sup>66</sup> Be, Pitabe pris buda gote kurunminde ya kurun koya beley po milgu irtin bana gon al gabu irde hanjen sawsawa kurun kura goyenter hikeyabe pris buda gote kurunminde meten bere kura wayyin. <sup>67</sup> Yenbe kak katen hinhin. Gwaha ten hikeya bere gore wan kenkela irdeb, “Ge manan Nasaret nin al Yesuya hinhan,” inyin. <sup>68</sup> Goyenpoga Pita beley helwan irdeb, “Gebe da nin yen ha? Neb goke kura yen ha yen ma nurde hime,” inenbe gabu gasun go tubul ten hoyande kurin. <sup>69</sup> Be, bere goreb Pita sopte po kenenbe gor huwarde hinhan mar goyen, “Yesuyen kadom kurabe gago,” yinyin. <sup>70</sup> Irkeb teban po helwan hirin.

Be, mun kura hitnen tenbe yen bindere hinhan mar goreb, “Fudinde, gebe Galili nin al. Ningeb kuraminbe ge gago,” inamin. <sup>71</sup> Irkeb huwardeb mere hitem po yirdeb, “Nebe Al Kurun beley nenen hikeya fudinde wor po dinen hime. Nebe al goke yen han yen ma nurde hime,” yinyin. <sup>72</sup> Irkeb goyare goyen po tatirok wawun irawa iryin. Irkeb Yesu beley, “Tatirok iraw ma irkeya ge wa wawun karwore ne nin yen, ‘Al gob go ma nurd unen hime,’ yawayin,” inyin goyen goke bin bak yirin. Irkeb mata tiyyin goke kanduknen wor po nurde esen epte ma tiyyin.

*Yesu Pailat dilinje huwaryin  
(Matiyu 27:1-2,11-14; Luk 23:1-5; Yon 18:28-38)*

<sup>1</sup> Be, wampot wor po pris buda gote karkuwanminya Moseyen saba marya Yuda marte doyan mar parguwakya doyan mar tumnan wan gabu irde mere sege irdeb, “Mayteke kami,” yamin. Irdeb Yesu hanin fere ten Pailat, Roma gabman belen ten kerke Israel wayyin doyan al goyen hitte tukamin. <sup>2</sup> Irkeb Pailat belen huwardeb, “Yuda marte doyan al kurun yen han gobe ge gago?” inen gusunan iryin. Irkeb Yesu belen wol henbe, “Gwaha, gigen yaha gog po,” inyin. <sup>3</sup> Be, pris buda gote karkuwanmin belen det budam nin Yesu goyen minje iramin. <sup>4</sup> Irkeb Pailat belen, “Dahade ningeb mere ulger irde han kurun gayen kura mun ma wol hen ha?” inen sopte gusunan iryin. <sup>5</sup> Goyenbe go ma haywan irke kenenbe dilin fot yirin.

<sup>6</sup> Be, Pasoba dula nalu kurun gwahade goyenterbe Pailat belen al koyare hanjen goyen Yuda mar belen po denje urkeb unkenen kura ten sinan irde hiyen. <sup>7</sup> Goyare goyenbe al kura denem Barabasya kadam yagoyabe bikken Roma gabman asogo irde fulenan ten al gasa yirke kamkeb yade koyare yeramin goyen hinhan. <sup>8</sup> Be, nalu goyenter Pailat belen mata ten hiyen go gwahade po diri yen nurdeb Yuda mar goyen Pailat gusunan irnin yen wayamin.

<sup>9-10</sup> Be, Pailatbe al budam pris buda gote karkuwanmin yubul ten Yesu gama irkeb pris buda gote karkuwanmin belen kenen danin nen ma gama dirhan yen nurdeb gogo Yesu

niñ igiñ ma nurde yeñ hitte tawayamiñ goyen bikken yeneñ bebak tiyyiñ. Niñgeb Pailat gore huwardeb, “Denbe Yuda marte doyañ al kurun gayen tubul teñ dunwoñ yeñ nurde hañ?” yineñ gusuñañ yiryiñ. <sup>11</sup> Gega pris buda gote karkuwañmiñ beleñ al buda kurun goyen, “Barabas siña ira innayiñ,” yeñ biñ yade tukamiñ.

<sup>12</sup> Be, Pailat beleñ huwardeb, “Be, gwaha yahañ geb, deñ beleñ Yuda marte doyañ al kurun ineñ hañ al gayenbe daha ireñ?” yineñ gusuñañ yiryiñ. <sup>13</sup> Irkeb al buda kurun goreb hokde po, “Kuruse hende mayke kami! Kuruse hende mayke kami!” yamiñ. <sup>14</sup> Irkeb Pailat beleñ sopte gusuñañ yirdeb, “Da misiñdeb gogo yahañ? Da mata buluñ tiyuñ?” yinyiñ. Gega al buda kurun gore mere nurtek ma hamiñ. Irdeb hokde wor po, “Kuruse hende mayke kami! Kuruse hende mayke kami!” yeñ tebañ tiyamiñ. <sup>15</sup> Irkeb Pailat beleñ al buda kurun goyen gwaha yirmeke biñde igiñ nurnañ yeñbe Barabas teñ siña irdeb Yesube teñ fulenñ marminñ haniñde kiryiñ. Irkeb tukun usulak teñbe kuruse hende mayniñ yeñ tukamiñ.

*Roma gabmanyen fulenñ mar beleñ Yesu gi-wgiw irde hinhan*

*(Matiyu 27:27-31; Yon 19:2-3)*

<sup>16</sup> Be, go mar goreb Pailatyen ya kurun goyen siña kurhan tukunbe fulenñ mar pasi po hoy yirke wañ gabu iramiñ. <sup>17</sup> Irdeb doyañ al kurunyen umña irhet yeñ amil umñam bukkenya digulakya suluk yirke bukken yara hitiñ kura goyen tawañ Yesu hor irde unenbe doyañ al

kurunyen tonanhor irhet yenbe kan danđanen yan ten tiga ilde tawan Yesu tonande misinen yan po keramin.

<sup>18</sup> Be, gwaha irdeya gab doyan al kurun turun irde hanyen gwahade irhet yen giwgiw irdeb, “Gebe Yuda marte doyan al kurun. Amanen nurde turun girhet,” inen bak mayde epte ma irde hinhan. <sup>19</sup> Irdeb he nukware tonande mayde teban irde meyan irde Yesu kahan minde katen dokolhon yugulun ten doyan al kurun palap irde hanyen gwahade irtin yara irde hinhan.

<sup>20</sup> Be, mel gobe gwaha mat Yesu go giwgiw irde amil umnam bukkenya digulakya suluk yirke bukken yara hitin kura hor irde unamin goyen tugu tenbe yende amil po sopte hor irde unamin. Irdeb tukun kuruse hende maynin yen ten sinare kwamin.

*Yesu kuruse hende mayamin*

*(Matiyu 27:32-44; Luk 23:26-43; Yon 19:17-27)*

<sup>21</sup> Be, goyare goyenbe Sairini nin al kura denembe Saimon goyen tiyun hoyande mat wan Yerusalem kun hinhin. Irkeb fulen mar belen belen kenenbe Yesu faran urde kuruse tiwi yen pakku iramin. Saimon gobe Aleksandaya Rufusat namin.

<sup>22</sup> Be, mel gore Yesu goyen tukun nana den kura Golgota inen hanyende gor tukamin. (Golgota den gote minbe ‘al tonan kinkininde’.) <sup>23</sup> Gorbe ulin misin falmuk ird irdde nin he fiminya wain fiminya suluk irtin goyen Yesu unamin. Gega go ma nirin. <sup>24</sup> Irkeb ten kuruse hende kerde kahanya haninya goyen heya karki

yirde nil po teŋ yuramiŋ. Irdeb amilmiŋ yugu tiyamiŋ goyen ganuŋ beŋ yawaryeŋ yeŋbe hora wet ma he parwek kura det kuldiŋ irtiŋ goyen teŋ yende matare tilin tanaramiŋ.

<sup>25</sup> Be, Yesube 9 kilok wampot kuruse hende mayamiŋ. <sup>26</sup> Irdeb da misiŋde mayke kamiŋ goyen he parwek kura teŋ gahade kaŋbe kuruse tonanŋde keramiŋ:

#### YUDA MARTE DOYAŋ AL KURUŋ

<sup>27-28</sup> Be, go nature goyen po kawo mar irawa kura goyen wor kuruse hende gasa yiramiŋ. Irdeb Yesuyen kurusebe kahalte kerdebe al irawa gotebe kurhan kurhan yeramiŋ.\*

<sup>29</sup> Be, al goyaŋ fole teŋ kuŋ hinhan gore keneŋbe biriŋ biriŋ teŋ, “Be, gebe, ‘Al Kurunyen ya balem goyen pir irde pasi heŋbe epte nanŋahal karwore po ireŋ,’ yariŋ go? <sup>30</sup> Niŋgeb kuruse hende mat gigeŋ tareŋger katke ginniŋ be,” ineŋ ayaŋ keramiŋ. <sup>31-32</sup> Al hoyan beŋ irde hinhan gwahade goyen po pris buda gote karkuwanmiŋya Moseyen saba marya yiŋgeŋ uliŋ wor huwardeb, “Al ga kennaŋ ko. Al hoyanbe faran yurde hiyen. Munan yiŋgeŋbe epte moŋ. Yeŋbe fudinde Israel marte doyaŋ al kurun Me-saia kenem mal po kuruse hende mat kati. Irke keneŋbe fudinde wor po yeŋ nurtek,” ineŋ gi-wgiw irde ayaŋ kerde epte ma tiyamiŋ. Irkeb Yesu bindere hinaryum al irawa kuruse hende gasa yiramiŋ gore wor gwahade po inaryum.

---

\* **15:27-28:** Asan hoyanbe gahade hi: 28 Kame mata gwahade fudinde forok yiyyeŋ yeŋbe Al Kurunyen asanbe gahade katiŋ hi: “Yeŋbe mata bulun marya kamiŋ.”

*Yesu kamyin**(Matiyu 27:45-56; Luk 23:44-49; Yon 19:28-30)*

<sup>33</sup> Be, kunj kunj nana bankahal wor po hekeb megen kurun gabe kidoma belen po alu urke kunj kunbe 3 kilok wawunbana hirin. <sup>34</sup> Be, 3 kilok wawunbana hekeb Yesu belen hokde po Al Kurun goyen, “Eloi, Eloi, Lama Sabaktani!” inyin. Gote minbe “Al Kurunne, Al Kurunne, daniñ nubil taha!” <sup>35</sup> Irkeb al goyan huwarde hinhan gore nurdeb, “Elaia hoy ira go nurnan,” yamin. <sup>36</sup> Goyen nurdeb al kura kup yen kunj amil erek irdeb tukurun wain fimin mukkuwen bana gon duk irdeb kutumde taw irdeb tawan, “Nawa,” inenbe, “Be, Elaia belen wan faran urde ten kerke katyen daw ninje, mekerke kenen hiniñ,” yirin. <sup>37</sup> Be, Yesu gobe ulin misiñ kurun wor po katen, “Woy!” yenbe yayen funan, “Ha!” irdeb kamyin. <sup>38</sup> Irkeb goyare po Al Kurunyen ya balem bana amilbe hende mat kahalte po erek yen katen iraw haryum. <sup>39</sup> Be, fulen marte doyan alminbe Yesu diliñ mat hen Yesu mere ten daha mat kamyin goyen kenenbe, “Fudinde, al gabe Al Kurun Urmin!” yirin.

<sup>40</sup> Be, goyarebe bere buda kura gisaw mat huwarde kenen hinhan. Bere gobe Galili mat Yesu gama irde Yerusalem wayamin. Makdala nin Mariaya Yosesya Yems dirnenyat miliñ Maria, irde Salome manan gor hinhan. <sup>41</sup> Bere karwo gabe Yesu Galili hinhinyabe gama irde faran urde dawet kuran nurde hikeb unen hanjen bere go goyen.

*Yesu mete tiyaminj  
(Matiyu 27:57-61; Luk 23:50-56; Yon 19:38-42)*

<sup>42</sup> Be, Yesu kamyinj nalu gobe Sabat nalu goke gitik ten ten nalure kamyinj. Nalu gobe Gitik ten ten Nalu inen hanjen. Be, Yesu kamyinj goyen wawunbanamindebe, “Hen ga ma Sabat nalu hewen tiya go,” yen nurdeb <sup>43</sup> Arimatea nin Yosep belen Yesu hakwam teke al hoyan belen al gobe Yesu gama irde hiyen al kurabe gogo yen bulun nurde untek goke ma nurdeb Pailat hitte kun Yesu hakwam ten ten nin gusunanj iryinj. Yenbe tiyun doyan mar gabu irde hanjen goyen bana nin al. Al budam belen nurd unen hanjen. Yinjenbe Al kurun belen alya bereyaminj doyan yird yird nalu goke doyan hen hiyen. <sup>44</sup> Be, Yosep gore gusunanj irkeb Pailatbe Yesu kama mere goyen nurdeb dinon kok yirinj. Irdeb fulenja marminde doyan al nin keya heke wakeb, “Yesube bikken kama?” inen gusunanj iryinj. <sup>45</sup> Irkeb al goreb, “Fudinde, gwaha tiya,” inke Pailat belen nurdeb Yesu hakwam goyen Yosep tubul ten unyinj. <sup>46</sup> Irkeb Yosep gobe kadomya kun amil faykenj damu ten tawan Yesu hakwam goyen faranj tenbe mala ten tukun al hakwam yerd yerd nin horabok taltinj bana gon keraminj. Irdeb hora kurun goyen kan kan irdeb tukun horabok mohon pet tiyaminj. <sup>47</sup> Makdala nin Mariaya Yoses milinj Mariayabe Yesu hakwam goyen gor kerhanj yen kenaryum.



*Yesu kamyinḡe mat huwaryin  
(Matiyu 28:1-8; Luk 24:1-12; Yon 20:1-10)*

<sup>1</sup> Be, Yuda marte usaḡ nalu, Sabat go hubu hekeb Makdala ninḡ Mariaya Yems miliḡ Mariayabe Salomeya gobe Yesu kamyinḡ hakwam goyen sam irtek yeḡ he fimiḡ kura hamiḡ igiḡ muḡ goyen damu tiyamiḡ. <sup>2</sup> Irdeb fay urke Sande wampot muḡ naḡa pirik irkeyabe horabok bembare kwamiḡ. <sup>3</sup> Kuḡ heḡyabe, “Horabok mohonḡ pet titiḡ hora kurunḡ gobe ganunḡ beḡeḡ kaḡ kaḡ irde siḡa ireḡ tiya?” yeḡ kadom gusunḡaḡ gird tiyamiḡ. <sup>4</sup> Gega hurkunḡ heḡyabe horabok bamba mohonḡe nanḡkenenḡbe hora kurunḡ wor po goyen bikkenḡ teḡ siḡa irtiḡ kenamiḡ. <sup>5</sup> Gwahade kenenḡbe kuḡ forok yeḡ horabok bana hurkunḡbe al fonḡeḡ kura uliḡhor faykek mananḡ yase beḡeḡ mat keperde hike kenenḡbe kafura hamiḡ. <sup>6</sup> Irkeb al goreb, “Kafura heḡ ma. Nasaret ninḡ al Yesu kuruse hende mayke kamunḡ goke wayhanḡ gobe gar ma hi. Yeḡbe bikkenḡ huwara. Keranḡ gasunḡdebe hubu ga kennanḡ. <sup>7</sup> Niḡgeḡ kuḡbe komatmiḡya Pitaya yeneḡ momonḡ yirnanḡ. Yesube yiḡgeḡ yiyunḡ gwahade po, yeḡ wa meheḡ heḡ Galili kuyeḡ. Gor gab kennayiḡ,” yinyiḡ. <sup>8</sup> Irkeb bere gobe kafura heḡ barbar yeḡ kukuwamḡeḡ nurdeb horabok bamba bana mat kateḡ siḡare heḡbe busaharde kwamiḡ. Gega kafura heḡbe mata kenamiḡ goke al kura ma momonḡ yiramiḡ.

*Yesu beḡeḡ komatmiḡ hulyanḡ yirdeb Al Kurunḡ hitte hurkurinḡ*

[ <sup>9</sup> Be, Yesu wampot muḡ huwaryinḡ goya goyen hanḡkapyabe Makdala ninḡ Maria diliḡde wa forok

yiriņ. Yeņbe uņgura 7 ketal urtiņ hinhin goyen Yesu belen sope irke igiņ hiriņ bere go goyen. <sup>10</sup> Be, bere go Yesu keneņ mulgaņ heņ kuņbe Yesu gama irde hanjen marya Yesu kamiņ gote dolonđe heņ esen hinhan marya goyen momoņ yiriņ. <sup>11</sup> Gega mel gobe bere gore, “Yesube kamuņde mat huwara. Irke kenhem,” yiniņ go nurdeb fudinde yeņ ma nuramiņ.

<sup>12</sup> Be, go kamereb Yesube komatmiņ irawa kura Yerusalem tubul teņ tiyuņ hoyande kuņ hikeya al hoyañ yara heņ yeņ hitte forok yiriņ. <sup>13</sup> Forok yeke keneņ bebak teņbe mulgaņ heņ kuņ kadom yago momoņ yiraryum. Gega yeņbe irem gore yaryum goyen manaņ fudinde yeņ ma nuramiņ.

<sup>14</sup> Be, go kamereb Yesu yiņgeņ komatmiņ 11 goyen ya bana heņ dula teņ hikeya forok yiriņ. Forok yeņbe al belen huwariņ kamere keneņ momoņ yirke ga tonañ tareņ irde usi tahaņ yeņ nurde wasak po tiyamiņ mar goyen goke yineņ teņ saba yiriņ. <sup>15</sup> Irdeb, “Kuņ naņa kuruņ al hike kwa goyen bana ne niņ yitiņ mere igiņ gayen tagalde momoņ yirde tukunayiņ. <sup>16</sup> Al kura baraņ gayen fudinde yeņ dufaymiņ saņiņ irde baptais tenayiņ mar gobe Al Kuruņ belen yumulgaņ tiyyeņ. Gega al gwaha ma tinayiņ mar gobe Al Kuruņ belen merem yaņ yiryeņ. <sup>17</sup> Ne niņ dufaymiņ tareņ irnayiņ mar gobe Al Kuruņyen tareņde mata tiņeņ gahade teņ hinayiņ: denner uņgura yakira teņ hinayiņ, naņa hoyande niņ mere mat Al Kuruņ mere irde hinayiņ, <sup>18</sup> haniņde kunere duwi yanarke yisinayiņ gega go ma kamnayiņ, fe det buluņ miņyaņ nene kamtek goyen

nenayin gega go ma kamnayin. Irdeb al gore garbam mar hanin yerde yunen Al Kurun gusunan irkeb igin henayin,” yinyin.

<sup>19</sup> Be, Doyan Al Kurun Yesu belen mere yiryin go kamereb Nanin Al Kurun belen tumulgan tike hurkun al denem yan hen hanin yase belen kipiryin.

<sup>20</sup> Be, go kamereb Yesuyen komatmin belen kun yen ge yitin mere igin goyen nanan al hike kwa kurun gayen bana tagalde tukamin. Gwaha ten hikeyabe Doyan Al Kurun belen komatminya hen meten ten mel gore mere ten hinhan goyen fudinde yen nurd nurd nin tenbe mata tinen turun yan kurayen kurayen goyen manan forok yirde hinhin.]

**Al Kurunyen Mere Igin  
The New Testament in the Gwahatike Language of  
Papua New Guinea  
Nupela Testamen long tok ples Gwahatike long  
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

---

PDF generated using Haiola and XeLaTeX on 11 Nov 2022 from source files dated 9 Oct 2020

dbba218f-41f3-5f08-b0b6-2a7c919093ab